

D.R. 2/96

Naskah Sahih—Bahasa Kebangsaan

**RANG UNDANG-UNDANG
INSTITUSI PENDIDIKAN TINGGI
SWASTA 1996**

SUSUNAN FASAL

BAHAGIAN I

PERMULAAN

Fasal

1. Tajuk ringkas dan mula berkuatkuasa.
2. Tafsiran.

BAHAGIAN II

PENTADBIRAN

3. Perlantikan Ketua Pendaftar, Timbalan Ketua Pendaftar, dll. dan tugas mereka.
4. Kuasa Menteri untuk mengeluarkan arahan am.
5. Kuasa Menteri untuk mengeluarkan arahan khas.

BAHAGIAN III

**PENUBUHAN INSTITUSI PENDIDIKAN
TINGGI SWASTA**

6. Permohonan untuk kelulusan.
7. Kepentingan lain hendaklah dizahirkan oleh pemohon.
8. Ketua Pendaftar hendaklah membuat syor kepada Menteri.
9. Ketua Pendaftar boleh enggan meneruskan tindakan ke atas permohonan.

Fasal

10. Pemberian kelulusan atau penolakan permohonan oleh Menteri.
11. Kelulusan tidak akan diberikan melainkan jika Menteri berpuas hati.
12. Pemohon hendaklah memperbadankan syarikat di dalam negeri.
13. Syarat yang sama hendaklah dikenakan atas syarikat.
14. Sebutan mengenai syarikat.
15. Kelulusan bagi pertukaran atau perubahan berkenaan dengan syarikat.
16. Pemberitahuan pertukaran alamat.
17. Maklumat yang dikehendaki oleh Ketua Pendaftar.
18. Penubuhan cawangan, atau bergabung, dsb. dengan institusi pendidikan tinggi swasta lain.
19. Kelulusan terdahulu Menteri mengenai perkiraan atau perjanjian.
20. Menteri boleh mengubah syarat.

BAHAGIAN IV

PENUBUHAN INSTITUSI PENDIDIKAN TINGGI SWASTA
BERTARAF UNIVERSITI, KOLEJ UNIVERSITI DAN
KAMPUS CAWANGAN

21. Penubuhan Universiti, Kolej Universiti dan kampus cawangan.
22. Permohonan bagi penubuhan dibuat atas pelawaan.
23. Akta ini hendaklah terpakai bagi Universiti, Kolej Universiti atau kampus cawangan.

BAHAGIAN V

PENDAFTARAN INSTITUSI PENDIDIKAN
TINGGI SWASTA

24. Semua institusi pendidikan tinggi swasta hendaklah didaftarkan.
25. Daftar institusi pendidikan tinggi swasta.
26. Perakuan pendaftaran hendaklah dipamerkan.

Fasal

27. Penolakan pendaftaran.
28. Pertukaran premis.
29. Kuasa Ketua Pendaftar untuk menambah, meminda, mengkensel atau mengubah syarat.

BAHAGIAN VI

PENGURUSAN INSTITUSI PENDIDIKAN TINGGI SWASTA

30. Perlembagaan.
31. Perlantikan dan pendaftaran ketua eksekutif.
32. Peraturan-peraturan mengenai pendaftaran ketua eksekutif.
33. Kewajipan ketua eksekutif.
34. Permohonan di bawah Akta hendaklah dibuat oleh ketua eksekutif.
35. Notis, permintaan maklumat dan perhubungan hendaklah ditujukan kepada ketua eksekutif.
36. Orang yang tidak layak terlibat dalam pengurusan institusi pendidikan tinggi swasta.
37. Kuasa Ketua Pendaftar untuk bertindak terhadap ketua eksekutif.

BAHAGIAN VII

PENGENDALIAN KURSUS PENGAJIAN DI INSTITUSI PENDIDIKAN TINGGI SWASTA

38. Kelulusan terdahulu Menteri mengenai kursus pengajian dan gabungan, dsb.
39. Pihak berkuasa yang menentukan cukup tidaknya kemudahan pendidikan dan penjaminan kualiti kursus pengajian.
40. Pemberian kelulusan tertakluk kepada syarat.
41. Bahasa pengantar.
42. Kuasa Menteri untuk mengarahkan supaya bahasa kebangsaan digunakan.
43. Mata pelajaran wajib.

Fasal

44. Tahap minimum hendaklah dicapai sebelum sijil, diploma atau ijazah boleh dianugerahkan.
45. Kuasa Menteri untuk membuat peraturan-peraturan bagi penyeliaan dan kawalan standard pendidikan.

BAHAGIAN VIII

DISIPLIN DAN TATAKELAKUAN PELAJAR

46. Pihak berkuasa disiplin berkenaan dengan pelajar.
47. Larangan ke atas pelajar, persatuan, badan atau kumpulan pelajar yang bersekutu dengan pertubuhan, dsb.
48. Tanggungan jenayah pemegang jawatan, dsb. dalam persatuan, badan atau kumpulan pelajar.
49. Kuasa Ketua Pendaftar untuk mengeluarkan arahan menggantung atau membubarkan mana-mana persatuan, badan atau kumpulan pelajar.
50. Peraturan-peraturan mengenai pembuangan pelajar.

BAHAGIAN IX

PERMIT MENGAJAR

51. Pengeluaran permit mengajar.
52. Kuasa Ketua Pendaftar untuk tidak mengeluarkan dan membatalkan permit mengajar.
53. Hak untuk membuat representasi hendaklah diberikan dan alasan tambahan bagi pembatalan.

BAHAGIAN X

PEMBATALAN KELULUSAN DAN
PENGKENSELAN PENDAFTARAN

54. Alasan bagi pembatalan kelulusan.
55. Alasan bagi pengkenselan pendaftaran.
56. Notis untuk membatalkan kelulusan dan mengkensel pendaftaran.
57. Keputusan hendaklah berdasarkan dokumen dan pendengaran secara lisan tidak dibenarkan.

BAHAGIAN XI

PENUTUPAN INSTITUSI PENDIDIKAN TINGGI SWASTA

Fasal

58. Kuasa Menteri untuk mengeluarkan arahan demi melindungi kepentingan pelajar.
59. Pemberhentian kegiatan perniagaan.
60. Notis tentang niat untuk menutup.
61. Perkiraan bagi penerusan pendidikan pelajar.
62. Pemulangan perakuan.

BAHAGIAN XII

PEMERIKSAAN INSTITUSI PENDIDIKAN TINGGI SWASTA

63. Pemeriksaan hendaklah dibuat dari semasa ke semasa.
64. Kuasa Ketua Pendaftar semasa memeriksa institusi pendidikan tinggi swasta.

BAHAGIAN XIII

PENGUATKUASAAN DAN PENYIASATAN

65. Tafsiran pegawai penyiasat.
66. Kuasa pegawai penyiasat.
67. Kuasa untuk menggeledah dan menyita.
68. Menggeledah dan menyita tanpa waran.
69. Kuasa untuk mengunci.
70. Kuasa untuk memanggil bagi tujuan pemeriksaan.
71. Tiada hak ke atas kos prosiding, kerugian atau relief lain, dsb.

BAHAGIAN XIV

KESALAHAN DAN PENALTI

72. Larangan tentang pengiklanan, dsb.
73. Kawalan pengiklanan.
74. Tafsiran pengiklanan.

Fasal

75. Kesalahan dan penalti berhubungan dengan pernyataan yang palsu atau mengelirukan.
76. Penubuhan institusi pendidikan tinggi swasta, dsb., dilarang melainkan jika mematuhi Akta.
77. Kesalahan dan penalti berhubungan dengan penganugerahan sijil, diploma dan ijazah.
78. Penalti kerana pelanggaran syarat.
79. Kesalahan dan penalti berhubungan dengan permohonan yang dibuat di bawah Akta.
80. Kesalahan dan penalti berhubungan dengan aktiviti tak sah.
81. Kesalahan dan penalti berhubungan dengan perakuan pendaftaran dan perbuatan mengajar di institusi pendidikan tinggi swasta.
82. Penalti am.
83. Penalti dalam hal kesalahan yang berterusan.
84. Kesalahan oleh pertubuhan perbadanan.
85. Tanggungan pengarah, dll. bagi kesalahan yang dilakukan oleh institusi pendidikan tinggi swasta yang ditubuhkan olehnya.
86. Kuasa untuk mengkompaun.
87. Memulakan dan menjalankan pendakwaan.

BAHAGIAN XV

PERATURAN-PERATURAN

88. Kuasa Menteri untuk membuat peraturan-peraturan.

BAHAGIAN XVI

AM

89. Membezakan antara ras dan kepercayaan dilarang.
90. Indemniti dan perlindungan daripada guaman dan prosiding undang-undang.
91. Pegawai disifatkan sebagai pengkhidmat awam.
92. Kuasa Menteri untuk mengecualikan.
93. Kehendak tentang premis.
94. Penyampaian.
95. Ketakoakaian.

BAHAGIAN XVII

PERUNTUKAN KECUALIAN DAN PERALIHAN

Fasal

96. Peruntukan kecualian dan peralihan berhubungan dengan institusi pendidikan tinggi swasta yang sedia ada.
97. Penukaran perakuan pendaftaran sementara.
98. Kuasa Menteri untuk membuat peruntukan peralihan tambahan.
99. Peruntukan peralihan berhubungan dengan guru.

RANG UNDANG-UNDANG

bernama

Suatu Akta untuk mengadakan peruntukan bagi penubuhan, pendaftaran, pengurusan dan pengawalseliaan, dan kawalan kualiti pendidikan yang diberikan oleh, institusi pendidikan tinggi swasta dan bagi perkara-perkara yang berkaitan dengannya.

[]

BAHAWASANYA pendidikan tinggi mempunyai peranan yang penting bagi menjayakan wawasan menuju ke arah kecemerlangan akademik dan peningkatan profesional dan teknikal di samping memenuhi keperluan tenaga kerja negara:

DAN BAHAWASANYA mengakui peranan institusi pendidikan tinggi swasta dalam menyediakan prasarana pendidikan yang mencukupi serta meningkatkan keupayaan untuk memenuhi permintaan terhadap pendidikan tinggi:

DAN BAHAWASANYA amatlah penting menyediakan kemudahan dan mengawalselia institusi pendidikan tinggi swasta supaya dapat dipastikan perkembangannya yang sihat dan pengadaan pendidikan berkualiti:

MAKA OLEH YANG DEMIKIAN, INILAH DIPERBUAT UNDANG-UNDANG oleh Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen dan dengan kuasa daripadanya, seperti berikut:

BAHAGIAN I

PERMULAAN

Tajuk ringkas
dan mula
berkuatkuasa.

1. Akta ini bolehlah dinamakan Akta Institusi Pendidikan Tinggi Swasta 1996 dan hendaklah mula berkuatkuasa pada tarikh yang ditetapkan oleh Menteri melalui pemberitahuan dalam *Warta*, dan Menteri boleh menetapkan tarikh yang berlainan bagi peruntukan yang berlainan dalam Akta ini.

Tafsiran.

2. Dalam Akta ini, melainkan jika konteksnya menghendaki makna yang lain—

"bahasa kebangsaan" ertinya bahasa Melayu sebagaimana yang ditentukan dalam Perkara 152 Perlembagaan Persekutuan;

"buku" termasuklah rekod maklumat dan rekod akaun atau perakaunan, bagaimana juapun dikumpulkan, direkodkan atau disimpan;

"diploma" ertinya diploma yang dianugerahkan kepada seseorang oleh institusi pendidikan tinggi swasta, sesudah tamat mengikuti dengan jayanya kursus pengajian yang dirancang supaya membawa kepada penganugerahan diploma itu atau yang setaraf dengannya;

"ditetapkan" ertinya ditetapkan oleh peraturan-peraturan yang dibuat di bawah Akta ini;

"dokumen konstituen" ertinya statut, piagam, memorandum dan perkara-perkara persatuan, kaedah-kaedah dan undang-undang kecil, perjanjian perkongsian atau suratcara lain yang di bawahnya atau melaluinya seseorang pemohon, bagi penubuhan institusi pendidikan tinggi swasta, ditubuhkan dan yang dalamnya struktur pengelolaan dan pentadbirannya, skop fungsinya, urusan, kuasa dan kewajibannya dinyatakan, sama ada dalam satu dokumen atau lebih;

"fee yang ditetapkan" ertinya fee yang dikehendaki supaya ditetapkan di bawah Akta ini;

"gabungan" termasuklah pengendalian program berkembar;

"guru" ertinya seseorang yang diambil kerja oleh institusi pendidikan tinggi swasta untuk menjadi guru dan termasuklah profesor kanan, profesor, penolong profesor, pensyarah kanan, pensyarah, penolong pensyarah dan tutor;

"ijazah" ertinya ijazah yang dianugerahkan kepada seseorang di peringkat Sarjana Muda atau di peringkat Sarjana atau di peringkat Kedoktoran oleh institusi pendidikan tinggi swasta yang bertaraf Universiti atau Kolej Universiti, atau kampus cawangan, sesudah tamat mengikut dengan jayanya kursus pengajian yang dirancang supaya membawa kepada penganugerahan ijazah itu atau yang setaraf dengannya;

"institusi pendidikan tinggi swasta" ertinya institusi pendidikan, termasuklah Universiti atau Kolej Unversiti atau kampus cawangan yang diluluskan dan didaftarkan di bawah Akta ini, dan tidak ditubuhkan atau disenggarakan oleh Kerajaan—

- (a) yang menyediakan pendidikan tinggi;
- (b) yang menyediakan pendidikan jarak jauh; atau
- (c) yang menyediakan pendidikan tinggi atau pendidikan jarak jauh dengan bergabung, bersekutu atau bekerjasama dengan—
 - (i) institusi pendidikan tinggi swasta yang diluluskan dan didaftarkan di bawah Akta ini;
 - (ii) institusi pendidikan tinggi lain—
 - (aa) sama ada atau tidak ditubuhkan di bawah undang-undang bertulis lain; atau
 - (bb) sama ada di dalam atau di luar Malaysia;
 - (iii) Universiti atau Kolej Universiti yang ditubuhkan di bawah Akta ini;

Akta 30.

- (iv) Universiti atau Kolej Universiti yang ditubuhkan di bawah Akta Universiti dan Kolej Universiti 1971;
- (v) Universiti atau Kolej Universiti lain—
 - (aa) sama ada atau tidak ditubuhkan di bawah undang-undang bertulis lain; atau
 - (bb) sama ada di dalam atau di luar Malaysia;
- (vi) kampus cawangan; atau
- (vii) badan profesional sama ada di dalam atau di luar Malaysia yang membawa kepada penganugerahan keanggotaan profesional badan profesional itu;

"kampus cawangan" ertinya cawangan institusi pendidikan tinggi swasta yang bertaraf Universiti atau Kolej Universiti dan termasuklah cawangan Universiti atau Kolej Universiti luar negeri, yang ditubuhkan di bawah Akta ini;

"kelulusan" ertinya kelulusan secara bertulis;

"ketua eksekutif" ertinya ketua eksekutif institusi pendidikan tinggi swasta;

"Ketua Pendaftar" ertinya Ketua Pendaftar Institusi Pendidikan Tinggi Swasta yang dilantik di bawah subseksyen 3(1);

"Kolej Universiti" dan "Universiti" ertinya institusi pendidikan tinggi swasta yang diberikan taraf Universiti atau Kolej Universiti di bawah seksyen 21, dan termasuklah institusi pendidikan tinggi swasta yang bergabung dengan Universiti atau Kolej Universiti sama ada di dalam atau di luar Malaysia, yang diberikan taraf Universiti atau Kolej Universiti;

"kursus pengajian" termasuklah program latihan;

"lembaga pengarah" ertinya lembaga pengarah syarikat yang menubuhkan institusi pendidikan tinggi swasta;

"pelajar" ertinya seseorang yang menerima pendidikan, ajaran, latihan atau pengajaran daripada atau di dalam institusi pendidikan tinggi swasta;

"pemohon" ertinya pemohon bagi penubuhan institusi pendidikan tinggi swasta dan termasuklah seseorang, kumpulan orang, yang diperbadankan atau tak diperbadankan, dan sama ada atau selainnya ditubuhkan melalui dokumen konstituen;

"Pendaftar" ertinya Pendaftar Institusi Pendidikan Tinggi Swasta yang dilantik di bawah subseksyen 3(2);

"pendidikan jarak jauh" ertinya ajaran atau latihan mengenai atau pengajaran pendidikan tinggi—

- (a) melalui media elektronik semata-mata;
- (b) melalui surat semata-mata;
- (c) sebahagiannya melalui media elektronik dan sebahagian lagi melalui surat dan kaedah-kaedah ajaran, latihan atau pengajaran yang lain; atau
- (d) sebahagiannya melalui media elektronik dan sebahagian lagi melalui surat atau kaedah-kaedah ajaran, latihan atau pengajaran yang lain;

"pendidikan tinggi" ertinya ajaran atau latihan mengenai atau pengajaran kursus pengajian yang membawa kepada penganugerahan sijil, diploma atau ijazah sesudah tamat diikuti dengan jayanya;

"Penolong Pendaftar" ertinya Penolong Pendaftar Institusi Pendidikan Tinggi Swasta yang dilantik di bawah subseksyen 3(2);

"Perkhidmatan Pendidikan" ertinya perkhidmatan awam di bawah perenggan (1)(h) Perkara 132 Perlembagaan Persekutuan;

"perlembagaan" dalam apa-apa konteks berhubungan dengan suatu institusi pendidikan tinggi swasta ertinya perlembagaan institusi pendidikan tinggi swasta itu;

"premis" ertinya bangunan yang digunakan sebagai institusi pendidikan tinggi swasta dan termasuklah bangunan bagi maksud menyediakan penginapan dan kemudahan lain bagi pelajar dan kakitangan institusi itu;

"surat" ertinya surat yang disampaikan dengan tangan atau melalui pos;

Akta 125. "syarikat" ertinya syarikat yang diperbadankan di bawah Akta Syarikat 1965 yang menubuhkan institusi pendidikan tinggi swasta di bawah Akta ini;

"Timbalan Ketua Pendaftar" ertinya Timbalan Ketua Pendaftar Institusi Pendidikan Tinggi Swasta yang dilantik di bawah subseksyen 3(2);

"Timbalan Pendaftar" ertinya Timbalan Pendaftar Institusi Pendidikan Tinggi Swasta yang dilantik di bawah subseksyen 3(2).

BAHAGIAN II

PENTADBIRAN

Perlantikan
Ketua
Pendaftar,
Timbalan
Ketua
Pendaftar,
dll. dan tugas
mereka.

3. (1) Maka hendaklah ada seorang Ketua Pendaftar Institusi Pendidikan Tinggi Swasta yang hendaklah dilantik oleh Menteri daripada kalangan pegawai dalam Perkhidmatan Pendidikan.

(2) Menteri hendaklah juga melantik seorang Timbalan Ketua Pendaftar dan sekian bilangan Pendaftar, Timbalan Pendaftar dan Penolong Pendaftar Institusi Pendidikan Tinggi Swasta, sebagaimana yang difikirkannya perlu bagi maksud Akta ini.

(3) Ketua Pendaftar hendaklah mempunyai kuasa dan menjalankan fungsi yang diberikan kepadanya oleh Akta

ini, dan sewaktu ketiadaannya kuasa dan fungsi sedemikian bolehlah dipunyai atau dijalankan oleh Timbalan Ketua Pendaftar.

(4) Timbalan Ketua Pendaftar, Pendaftar, Timbalan Pendaftar dan Penolong Pendaftar hendaklah di bawah arahan dan kawalan Ketua Pendaftar.

(5) Timbalan Ketua Pendaftar, Pendaftar, Timbalan Pendaftar dan Penolong Pendaftar boleh menjalankan kesemua kuasa dan fungsi yang diberikan kepada Ketua Pendaftar oleh atau di bawah Akta ini, tertakluk kepada apa-apa sekatan yang boleh dikenakan oleh Ketua Pendaftar.

4. (1) Menteri boleh, dari semasa ke semasa, memberikan seseorang pegawai yang dilantik di bawah Bahagian ini arahan yang bersifat am, yang tidak tak konsisten dengan peruntukan Akta ini, tentang penjalanan kuasa dan budi bicara yang diberikan kepada pegawai itu oleh, dan kewajipan yang hendaklah ditunaikan oleh, pegawai itu di bawah Akta ini.

Kuasa Menteri untuk mengeluarkan arahan am.

(2) Arahan yang diberikan di bawah subseksyen (1) bolehlah yang berhubungan dengan perkara yang didapati oleh Menteri menyentuh dasar, strategi dan garis panduan kebangsaan mengenai pendidikan tinggi yang dirumuskan dan ditentukan oleh Majlis Pendidikan Tinggi Negara yang ditubuhkan di bawah Akta Majlis Pendidikan Tinggi Negara 1996.

Akta

(3) Pegawai yang kepadanya arahan diberikan di bawah seksyen ini hendaklah melaksanakan tiap-tiap arahan sedemikian.

5. Menteri boleh, dari semasa ke semasa, memberikan lembaga pengarah, ketua eksekutif atau pekerja institusi pendidikan tinggi swasta, arahan yang tidak tak konsisten dengan peruntukan Akta ini berhubungan dengan perkara yang berkenaan dengannya peraturan-peraturan boleh dibuat di bawah Akta ini, dan lembaga pengarah, ketua eksekutif atau pekerja berkenaan hendaklah melaksanakan tiap-tiap arahan sedemikian.

Kuasa Menteri untuk mengeluarkan arahan khas.

BAHAGIAN III

PENUBUHAN INSTITUSI PENDIDIKAN TINGGI SWASTA

Permohonan
untuk
kelulusan.

6. (1) Kelulusan Menteri hendaklah diperolehi terlebih dahulu sebelum sesuatu institusi pendidikan tinggi swasta boleh ditubuhkan atau disenggarakan.

(2) Permohonan bagi mendapatkan kelulusan di bawah Bahagian ini hendaklah dibuat kepada Ketua Pendaftar—

(a) dalam borang yang ditetapkan dan mengikut cara yang ditetapkan;

(b) disertai dengan fee yang ditetapkan;

(c) dengan mengemukakan bersekali dengan permohonan itu—

(i) pelan menyeluruh bagi penubuhan dan penyenggaraan yang sepatutnya akan institusi pendidikan tinggi swasta yang dicadangkan;

(ii) salinan draf perlembagaan institusi pendidikan tinggi swasta yang dicadangkan; dan

(iii) jika pemohon—

(aa) seseorang orang natural, laporan kedudukan kewangannya daripada jurubanknya; atau

(bb) bukan seseorang orang natural—

(A) salinan memorandum dan perkara-perkara persatuan atau dokumen konstituen lain yang di bawahnya pemohon ditubuhkan, yang ditentusahkan dengan sewajarnya melalui perakuan statutori yang dibuat oleh pegawai yang diberikuasa bagi pemohon; dan

(B) salinan kunci kira-kira teraudit, akaun untung rugi dan laporan, yang terbaru, jika ada, oleh juruaudit dan pengarah pemohon, jika berkenaan; dan

(d) apa-apa maklumat, butir-butir atau dokumen lain sebagaimana yang diminta oleh Ketua Pendaftar bagi maksud menentukan permohonan dan kesesuaian pemohon.

(3) Pada bila-bila masa selepas menerima permohonan itu dan sebelum ia ditentukan oleh Menteri, Ketua Pendaftar boleh melalui notis secara bertulis menghendaki pemohon memberikan maklumat, butir-butir atau dokumen tambahan.

(4) Perkara yang dinyatakan dalam subseksyen (2) dan yang dikehendaki di bawah subseksyen (3) boleh berbeza antara pemohon, kelas, kategori atau perihalan pemohon yang berlainan.

(5) Permohonan di bawah seksyen ini boleh ditarik balik pada bila-bila masa sebelum ia dibenarkan atau ditolak.

(6) Jika maklumat, butir-butir atau dokumen tambahan yang dikehendaki di bawah perenggan (2)(d) atau subseksyen (3) tidak diberikan oleh pemohon dalam masa yang dinyatakan dalam kehendak itu atau lanjutan masa yang diberikan baginya, maka permohonan itu—

(a) hendaklah disifatkan telah ditarik balik; dan

(b) tidak boleh diteruskan,

tanpa menjejaskan hak pemohon membuat permohonan baru.

7. Tanpa menjejaskan seksyen 6, pemohon hendaklah menzahirkan atau memberikan dalam permohonannya maklumat berkenaan dengan—

(a) mana-mana kelulusan lain yang telah diberikan kepada pemohon di bawah Akta ini;

Kepentingan lain hendaklah dizahirkan oleh pemohon.

- (b) apa-apa kepentingan kewangan walau apa jua pun yang dipunyai oleh pemohon dalam perniagaan mana-mana orang atau syarikat lain yang mengadakan atau menguruskan institusi pendidikan tinggi sama ada di dalam atau di luar Malaysia;
- (c) apa-apa kepentingan atau hak yang dipunyai oleh orang lain dalam perniagaan pemohon dan dalam hal pemohon yang merupakan syarikat, apa-apa hak yang dipunyai oleh orang lain untuk menamakan pengarah syarikat pemohon;
- (d) urusan perniagaan lain pemohon; dan
- (e) apa-apa kepentingan kewangan walau apa jua pun atau hak yang dipunyai oleh orang atau syarikat lain dalam urusan perniagaan yang lain pemohon.

Ketua Pendaftar hendaklah membuat syor kepada Menteri.

8. Ketua Pendaftar hendaklah, apabila permohonan dibuat dengan sewajarnya mengikut seksyen 6 dan 7, dan setelah diberikan segala maklumat, butir-butir dan dokumen yang dikehendaki oleh Ketua Pendaftar di bawah seksyen tersebut—

- (a) mengambil langkah yang perlu untuk menyemak permohonan itu;
- (b) meluluskan perlembagaan; dan
- (c) membuat syor kepada Menteri tentang sama ada kelulusan boleh diberikan atau ditolak dan syarat, jika perlu, yang hendaklah dikenakan oleh Menteri.

Ketua Pendaftar boleh enggan meneruskan tindakan ke atas permohonan.

9. Ketua Pendaftar boleh enggan meneruskan tindakan ke atas suatu permohonan, dan boleh menghendaki supaya permohonan itu dipinda atau dilengkapkan dengan sepatutnya dan dikemukakan semula atau supaya suatu permohonan baru dikemukakan bagi menggantikannya jika—

- (a) borang permohonan sebagaimana yang ditetapkan tidak dilengkapi dengan sewajarnya disebabkan apa-apa peninggalan atau salah perihalan;

- (b) borang permohonan itu mengandungi kesilapan atau perubahan; atau
- (c) permohonan itu tidak mematuhi keperluan yang ditetapkan.

10. (1) Selepas menerima dan menimbangkan syor Ketua Pendaftar di bawah seksyen 8, Menteri—

Pemberian kelulusan atau penolakan permohonan oleh Menteri.

- (a) boleh memberikan kelulusan bagi penubuhan institusi pendidikan tinggi swasta, dengan bersyarat atau tanpa syarat; atau
- (b) boleh menolak permohonan itu tanpa memberikan sebab bagi penolakan itu.

(2) Jika Menteri menolak suatu permohonan, Ketua Pendaftar hendaklah memberitahu pemohon mengenai penolakan itu secara bertulis.

(3) Menteri boleh, pada memberikan kelulusan di bawah subseksyen (1), meminta pemohon membayar fee yang ditetapkan.

(4) Keputusan Menteri di bawah seksyen ini adalah muktamad.

11. Kelulusan bagi penubuhan institusi pendidikan tinggi swasta tidak boleh diberikan melainkan jika Menteri berpuas hati bahawa—

Kelulusan tidak akan diberikan melainkan jika Menteri berpuas hati.

- (a) pemohon berkebolehan menyediakan kemudahan pendidikan yang mencukupi bagi penubuhan institusi pendidikan swasta itu;
- (b) pemohon berkebolehan menyediakan pengurusan dan pentadbiran yang mencukupi dan cekap bagi perjalanan yang sepatutnya akan institusi pendidikan tinggi swasta itu;
- (c) langkah yang mencukupi telah diambil bagi menentukan dan mengekalkan tahap pendidikan yang disediakan oleh institusi pendidikan tinggi swasta itu;

- (d) telah diadakan sistem pengelolaan yang teratur bagi institusi pendidikan tinggi swasta itu serta perlembagaan yang hendaklah diluluskan oleh Ketua Pendaftar;
- (e) melainkan jika pemohon sendiri bukanlah atau mana-mana ahli atau pekongsi pemohon bukanlah seorang yang telah disabitkan atas kesalahan yang melibatkan fraud atau ketidakjujuran atau seorang bankrap yang belum dilepaskan, jika permohonan dibuat masing-masing oleh seseorang atau kumpulan orang atau firma; dan
- (f) melainkan jika tiada seorang pun yang telah disabitkan atas kesalahan yang raelibatkan fraud atau ketidakjujuran atau merupakan seorang bankrap yang belum dilepaskan—
 - (i) memegang jawatan sebagai pengarah, pengurus atau setiausaha atau jawatan atau kedudukan lain yang seumpamanya, jika permohonan dibuat oleh syarikat; atau
 - (ii) memegang jawatan sebagai presiden, setiausaha atau bendahari atau jawatan atau kedudukan lain yang seumpamanya, jika permohonan dibuat oleh pertubuhan.

Pemohon hendaklah memperbadankan syarikat di dalam negeri.

12. (1) Apabila kelulusan diberikan, jika pemohon yang berjaya itu bukan syarikat yang diperbadankan di dalam negeri, pemohon hendaklah, dalam masa satu tahun dari diberitahu tentang kelulusan itu, memperbadankan suatu syarikat di dalam negeri—

- (a) yang mempunyai modal terbitan dan membayar dalam amaun yang ditentukan oleh Menteri;
- (b) tertakluk kepada apa-apa terma dan syarat mengenai penyertaan ekuiti dan keanggotaan lembaga pengarah yang ditentukan oleh Menteri; dan

- (c) yang tujuan tunggalnya iaitu menubuhkan dan menguruskan institusi pendidikan tinggi swasta yang dinyatakan dalam memorandum dan perkara-perkara persatuan.

(2) Kelulusan Ketua Pendaftar mengenai memorandum dan perkara-perkara persatuan yang dicadangkan bagi syarikat hendaklah didapatkan terlebih dahulu sebelum permohonan dibuat bagi memperbadankan syarikat itu.

(3) Jika pemohon itu gagal memperbadankan syarikat di dalam negeri dalam masa yang dinyatakan dalam subseksyen (1), kelulusan yang diberikan bagi penubuhan institusi pendidikan tinggi swasta hendaklah disifatkan telah ditarik balik melainkan jika lanjutan masa telah diberikan oleh Ketua Pendaftar.

(4) Walau apa pun perenggan (1)(b), jika pemohon ialah seorang orang natural dia hendaklah pada setiap masa—

- (a) mempunyai kepentingan kawalan dalam syarikat; dan
 (b) memegang apa-apa peratusan saham mengundi dalam syarikat sebagaimana yang ditentukan oleh Menteri.

13. Syarat yang sama seperti dalam perenggan I2(1)(a), (b) dan (c) bolehlah dikenakan ke atas syarikat yang kepadanya kelulusan di bawah Bahagian ini telah diberikan.

Syarat yang sama hendaklah dikenakan atas syarikat.

14. Bagi maksud seksyen 15, 16 dan 17, sebutan mengenai syarikat adalah sebutan mengenai syarikat yang kepadanya kelulusan di bawah Bahagian ini telah diberikan dan syarikat yang ditubuhkan di bawah seksyen 12.

Sebutan mengenai syarikat.

15. Melainkan jika kelulusan Ketua Pendaftar telah didapatkan terlebih dahulu, suatu syarikat tidak boleh menukar atau mengubah—

Kelulusan bagi pertukaran atau perubahan berkenaan dengan syarikat.

- (a) namanya;
 (b) modal terbitan dan berbayarnya;

- (c) penyertaan ekuitinya;
- (d) keanggotaan lembaga pengarahnya; dan
- (e) memorandum dan perkara-perkara persatuannya.

Pemberitahuan
pertukaran
alamat.

16. Suatu syarikat hendaklah memberitahu Ketua Pendaftar tentang apa-apa pertukaran pada alamat perniagaannya, dalam masa empat belas hari dari pertukaran itu.

Maklumat
yang
dikehendaki
oleh Ketua
Pendaftar.

17. Maka hendaklah menjadi kewajipan tiap-tiap syarikat untuk memberikan apabila diminta oleh Ketua Pendaftar, dalam tempoh yang ditentukan olehnya, butir-butir—

- (a) mengenai apa-apa kepentingan kewangan walau apa jua pun yang dipunyai oleh orang lain dalam perniagaan syarikat itu atau hak yang dipunyai oleh orang lain untuk menamakan pengarah syarikat itu; dan
- (b) mengenai apa-apa kepentingan atau hak yang dipunyai oleh syarikat itu dalam perniagaan orang lain sama ada yang berhubungan dengan pendidikan atau selainnya.

Penubuhan
cawangan,
atau
bergabung,
dsb. dengan
institusi
pendidikan
tinggi swasta
lain.

18. (1) Kelulusan Menteri hendaklah didapatkan terlebih dahulu sebelum institusi pendidikan tinggi swasta menubuhkan cawangan atau bergabung, bersekutu atau bekerjasama dengan mana-mana institusi pendidikan tinggi lain, sama ada swasta atau awam.

(2) Permohonan untuk mendapatkan kelulusan di bawah subseksyen (1) hendaklah dibuat kepada Ketua Pendaftar—

- (a) dalam borang yang ditetapkan dan mengikut cara yang ditetapkan; dan
- (b) disertai fee yang ditetapkan.

(3) Pada bila-bila masa selepas menerima permohonan itu dan sebelum ia ditentukan oleh Menteri, Ketua Pendaftar boleh menghendaki melalui notis bertulis maklumat, butir-butir atau dokumen tambahan.

(4) Jika maklumat, butir-butir atau dokumen tambahan yang dikehendaki di bawah subseksyen (3) tidak diberikan dalam masa yang ditetapkan dalam kehendak itu atau apa-apa lanjutan masa, permohonan itu—

- (a) hendaklah disifatkan telah ditarik balik; dan
- (b) tidak boleh diteruskan,

tanpa menjejaskan hak pemohon untuk membuat permohonan baru.

(5) Ketua Pendaftar hendaklah apabila permohonan dibuat dengan sewajarnya di bawah seksyen ini dan selepas diberikan kesemua maklumat, butir-butir dan dokumen yang dikehendakinya di bawah subseksyen (4)—

- (a) mengambil langkah yang perlu bagi menimbangkan permohonan itu; dan
- (b) membuat syor kepada Menteri sama ada permohonan itu patut dibenarkan atau ditolak dan syarat, jika ada, yang boleh dikenakan oleh Menteri.

(6) Setelah menerima dan menimbangkan syor Ketua Pendaftar, Menteri—

- (a) boleh memberikan kelulusan di bawah subseksyen (1), dengan atau tanpa syarat; atau
- (b) boleh menolak permohonan itu tanpa memberikan apa-apa sebab bagi penolakan itu.

(7) Jika Menteri menolak permohonan itu, Ketua Pendaftar hendaklah memberitahu pemohon tentang penolakan itu secara bertulis.

(8) Menteri boleh, pada memberikan kelulusan di bawah perenggan (6)(a), menghendaki institusi pendidikan tinggi swasta itu membayar apa-apa amaun fee yang ditetapkan.

(9) Keputusan Menteri di bawah seksyen ini adalah muktamad.

Kelulusan terdahulu Menteri mengenai perkiraan atau perjanjian.

19. (1) Institusi pendidikan tinggi swasta tidak boleh membuat perkiraan atau perjanjian—

- (a) untuk menjual, melupuskan atau membangunkan semula; atau
- (b) untuk mengambil apa-apa tindakan yang akan menjejaskan secara yang material,

perniagaannya berhubungan dengan pendidikan sama ada melalui penyatuan atau selainnya, melainkan jika diluluskan oleh Menteri.

(2) Permohonan untuk mendapatkan kelulusan di bawah subseksyen (1) hendaklah dibuat kepada Ketua Pendaftar—

- (a) dalam borang yang ditetapkan dan mengikut cara yang ditetapkan;
- (b) disertai dengan fee yang ditetapkan; dan
- (c) dengan mengemukakan bersekali dengan permohonan itu—
 - (i) salinan perjanjian atau perkiraan yang dicadangkan; dan
 - (ii) semua maklumat, butir-butir dan dokumen lain yang berkaitan dengan secara langsung dan tak langsung dengan perjanjian atau perkiraan itu atau yang relevan bagi pertimbangannya.

(3) Pada bila-bila masa selepas menerima permohonan dan sebelum ia ditentukan oleh Menteri, Ketua Pendaftar boleh dengan notis bertulis menghendaki maklumat, butir-butir atau dokumen tambahan.

(4) Jika apa-apa maklumat, butir-butir atau dokumen tambahan yang dikehendaki di bawah subseksyen (3)

tidak diberikan dalam masa yang ditetapkan dalam kehendak itu atau apa-apa lanjutan masa, permohonan itu—

- (a) hendaklah disifatkan telah ditarik balik; dan
- (b) tidak boleh diteruskan,

tanpa menjejaskan pemohon untuk membuat permohonan baru.

(5) Ketua Pendaftar hendaklah menerima apabila permohonan dibuat dengan sewajarnya di bawah seksyen ini' dan selepas diberikan kesemua maklumat, butir-butir dan dokumen yang diminta olehnya di bawah subseksyen (3)—

- (a) mengambil tindakan yang perlu bagi menyemak permohonan itu; dan
- (b) membuat syor kepada Menteri mengenai sama ada permohonan itu—
 - (i) boleh diluluskan atau ditolak; dan
 - (ii) tentang ubahsuaian, pengubahan atau syarat, jika ada, tertakluk kepadanya ia diluluskan.

(6) Apabila menerima dan setelah menimbang syor Ketua Pendaftar, Menteri—

- (a) boleh meluluskan permohonan itu dengan atau tanpa apa-apa ubahsuaian, pengubahan atau syarat; atau
- (b) menolak permohonan itu tanpa memberikan apa-apa sebab bagi penolakan itu.

(7) Jika Menteri menolak suatu permohonan, Ketua Pendaftar hendaklah memberitahu pemohon itu mengenai penolakan itu secara bertulis.

(8) Menteri boleh, pada memberikan kelulusan di bawah perenggan (6)(a), menghendaki institusi pendidikan tinggi swasta itu membayar apa-apa amaun fee yang ditetapkan.

(9) Keputusan Menteri di bawah seksyen ini adalah muktamad.

Menteri boleh mengubah syarat.

20. Menteri boleh pada bila-bila masa—

- (a) mengubah, mengkensel, menukar atau menambah kepada apa-apa syarat di bawah—
 - (i) perenggan 10(1)(aj);
 - (ii) perenggan 12(1)(a), (b) dan (4)(b);
 - (iii) subseksyen 18(6); dan
 - (iv) subseksyen 19(6); atau
- (b) mengenakan apa-apa syarat baru atau tambahan di bawah peruntukan yang dinyatakan dalam perenggan (a), yang difikirkan patut oleh Menteri bagi melaksanakan peruntukan Akta ini.

BAHAGIAN IV

PENUBUHAN INSTITUSI PENDIDIKAN TINGGI SWASTA BERTARAF UNIYERSITI, KOLEJ UNIYERSITI DAN KAMPUS CAWANGAN

Penubuhan Universiti, Kolej Universiti dan kampus cawangan.

21. Kelulusan Menteri hendaklah didapatkan terlebih dahulu bagi penubuhan institusi pendidikan tinggi swasta yang bertaraf Universiti atau Kolej Universiti atau kampus cawangan kedua-duanya atau kampus cawangan Universiti atau Kolej Universiti luar negeri.

Permohonan bagi penubuhan dibuat atas pelawaan.

22. (1) Permohonan bagi mendapatkan kelulusan di bawah seksyen 21 boleh dibuat kepada Menteri atas pelawaannya untuk berbuat sedemikian.

(2) Pelawaan di bawah subseksyen (1) boleh dibuat kepada pemohon yang dicadangkan, termasuk kepada Universiti dan Kolej Universiti luar negeri dan kampus cawangan luar negeri, sama ada secara langsung atau melalui pengumuman dalam media atau selainnya.

23. Kecuali sebagaimana yang diperuntukkan dengan nyata di bawah seksyen 21 dan 22 semua peruntukan Akta ini hendaklah terpakai bagi institusi pendidikan tinggi swasta yang bertaraf Universiti atau Kolej Universiti atau kampus cawangan kedua-duanya atau kampus cawangan Universiti atau Kolej Universiti luar negeri yang ditubuhkan di bawah Bahagian ini.

Akta ini hendaklah terpakai bagi Universiti, Kolej Universiti dan kampus cawangan.

BAHAGIAN V

PENDAFTARAN INSTITUSI PENDIDIKAN TINGGI SWASTA

24. (1) Tiap-tiap institusi pendidikan tinggi swasta hendaklah didaftarkan di bawah Bahagian ini.

Semua institusi pendidikan tinggi swasta hendaklah didaftarkan.

(2) Permohonan bagi pendaftaran hendaklah dibuat kepada Ketua Pendaftar—

- (a) dalam masa lima tahun dari tarikh kelulusan bagi penubuhan institusi pendidikan tinggi swasta yang diberikan di bawah Bahagian III;
- (b) dalam borang yang ditetapkan dan mengikut cara yang ditetapkan;
- (c) disertai fee yang ditetapkan; dan
- (d) bersekali dengan struktur fee yang menyeluruh yang hendak dikenakan ke atas pelajar mengenai setiap kursus pengajian.

(3) Jika institusi pendidikan tinggi swasta itu tidak didaftarkan dalam masa yang dinyatakan dalam perenggan (2)(a), maka kelulusan yang diberikan bagi penubuhannya di bawah Bahagian III hendaklah disifatkan ditarik balik melainkan jika lanjutan masa diberikan oleh Menteri.

(4) Pada bila-bila masa selepas menerima permohonan pendaftaran dan sebelum ia ditentukan, Ketua Pendaftar boleh, melalui notis bertulis, menghendaki institusi pendidikan tinggi swasta itu memberikan maklumat, butir-butir atau dokumen tambahan.

(5) Kehendak di bawah subseksyen (4) boleh berbeza antara perihalan yang berlainan institusi pendidikan tinggi swasta.

(6) Permohonan pendaftaran boleh ditarik balik pada bila-bila masa sebelum ia dibenarkan atau ditolak.

(7) Tertakluk kepada subseksyen (3), jika maklumat, butir-butir atau dokumen tambahan yang dikehendaki di bawah subseksyen (4) tidak diberikan dalam masa yang ditetapkan dalam kehendak itu atau lanjutan masa, permohonan itu—

(a) hendaklah disifatkan telah ditarik balik; dan

(b) tidak boleh diteruskan,

tanpa menjejaskan institusi pendidikan tinggi swasta itu untuk membuat permohonan baru.

(8) Ketua Pendaftar boleh menolak untuk meneruskan sesuatu permohonan dan boleh meminta supaya permohonan itu dipinda atau dilengkapkan dan mengemukakannya semula atau mengemukakan suatu permohonan baru bagi menggantikannya jika—

(a) borang permohonan yang ditetapkan tidak dilengkapkan dengan sempurna disebabkan oleh apa-apa peninggalan atau salah perihalan;

(b) borang permohonan mengandungi kesalahan atau perubahan; atau

(c) permohonan itu tidak mematuhi apa-apa keperluan yang ditetapkan.

(9) Ketua Pendaftar boleh, apabila permohonan bagi pendaftaran dibuat dengan sewajarnya dan selepas apa-apa penyiasatan yang difikirkannya perlu—

(a) mendaftarkan dan mengeluarkan perakuan pendaftaran kepada institusi pendidikan tinggi swasta itu setelah dibayar fee yang ditetapkan; atau

(b) menolak permohonan itu.

(10) Ketua Pendaftar boleh mengenakan apa-apa syarat yang difikirkannya perlu atas pendaftaran.

(11) Institusi pendidikan tinggi swasta yang terkilan dengan keputusan Ketua Pendaftar—

- (a) menolak permohonan pendaftaran; atau
- (b) mengenakan apa-apa syarat di bawah subseksyen (10),

boleh merayu kepada Menteri, dalam masa dua puluh satu hari dari diberitahu tentang keputusan yang dirayui itu.

(12) Jika terdapat rayuan yang dibuat di bawah subseksyen (11), Ketua Pendaftar hendaklah menyediakan dan mengemukakan kepada Menteri alasan keputusannya.

25. (1) Ketua Pendaftar hendaklah menyimpan atau menyebabkan disimpan suatu daftar institusi pendidikan tinggi swasta dalam bentuk dan mengikut cara yang ditetapkan.

Daftar institusi pendidikan tinggi swasta.

(2) Orang awam boleh membuat carian ke atas daftar selepas membayar fee yang ditetapkan.

26. (1) Bagi maksud Bahagian ini, suatu institusi pendidikan tinggi swasta hendaklah dikenali dengan premis yang digunakan bagi maksudnya.

Perakuan pendaftaran hendaklah dipamerkan.

(2) Salinan perakuan pendaftaran yang dikeluarkan di bawah perenggan 24(9)(a) hendaklah dipamerkan di tempat yang mudah dilihat di premis institusi pendidikan tinggi swasta itu.

27. Ketua Pendaftar boleh enggan mendaftarkan suatu institusi pendidikan tinggi swasta jika dia berpuas hati—

Penolakan pendaftaran.

- (a) bahawa institusi pendidikan tinggi swasta itu atau mana-mana bahagiannya, atas alasan keselamatan dan kesihatan—
 - (i) adalah tak sesuai bagi kegunaan sebagai institusi pendidikan;

- (ii) tidak mempunyai kawasan yang mencukupi dan memuaskan bagi rekreasi pelajar;
 - (iii) terletak di tempat yang tak sesuai;
 - (iv) adalah tak sesuai disebabkan oleh bahaya kebakaran; atau
 - (v) adalah selainnya suatu bangunan yang berbahaya;
- (b) bahawa institusi pendidikan tinggi swasta itu berkemungkinan digunakan bagi maksud memberikan pendidikan, ajaran atau latihan yang difikirkan oleh Ketua Pendaftar, atas apa-apa sebab, sebagai memudaratkan kepentingan Malaysia, orang awam atau pelajar;
- (c) bahawa nama yang dengannya institusi pendidikan tinggi swasta itu didaftarkan adalah pada pendapat Ketua Pendaftar, tak sesuai; atau
- (d) bahawa struktur fee yang dicadangkan bagi pelajar adalah tak munasabah.

Pertukaran
premis.

28. (1) Institusi pendidikan tinggi swasta tidak boleh berpindah premis tanpa mendapat kelulusan Ketua Pendaftar terlebih dahulu.

(2) Permohonan bagi pendaftaran premis baru institusi pendidikan tinggi swasta hendaklah dibuat kepada Ketua Pendaftar dalam borang yang ditetapkan mengikut cara yang ditetapkan dan selepas membayar fee yang ditetapkan.

(3) Institusi pendidikan tinggi swasta yang melanggar subseksyen (1) adalah melakukan suatu kesalahan dan apabila disabitkan boleh didenda tidak melebihi lima puluh ribu ringgit atau dipenjarakan selama tempoh tidak melebihi enam bulan atau kedua-duanya.

- 29.** Ketua Pendaftar boleh, pada bila-bila masa, menggunakan budi bicaranya—
- (a) untuk menambah, meminda, mengkensel atau mengubah apa-apa syarat pendaftaran; atau
 - (b) mengenakan syarat pendaftaran yang baru atau syarat tambahan.
- Kuasa Ketua Pendaftar untuk menambah, meminda, mengkensel atau mengubah syarat.

BAHAGIAN VI

PENGURUSAN INSTITUSI PENDIDIKAN TINGGI SWASTA

- 30.** (1) Tertakluk kepada peruntukan Akta ini, tiap-tiap institusi pendidikan tinggi swasta hendaklah diuruskan dengan mengikuti perlembagaannya secara tegas.

(2) Perlembagaan itu tidak boleh dipinda tanpa mendapat kelulusan Ketua Pendaftar terlebih dahulu.

- 31.** (1) Tiap-tiap institusi pendidikan tinggi swasta hendaklah melantik seorang ketua eksekutif.

(2) Seseorang yang dilantik sebagai ketua eksekutif hendaklah didaftarkan di bawah Bahagian ini.

(3) Ketua Pendaftar boleh enggan mendaftarkan atau mengkenselkan pendaftaran seorang ketua eksekutif—

- (a) jika telah dibuktikan terhadapnya, atau dia telah disabitkan atas, pertuduhan berkenaan dengan—
 - (i) suatu kesalahan yang melibatkan fraud, ketakjujuran atau keburukan akhlak;
 - (ii) suatu kesalahan di bawah undang-undang berhubungan dengan rasuah; atau

Perlembagaan.

Perlantikan dan pendaftaran ketua eksekutif.

- (iii) apa-apa kesalahan lain yang boleh dihukum dengan pemenjaraan (atas kesalahan itu sendiri atau sebagai tambahan kepada atau ganti denda) selama lebih daripada dua tahun;
- (b) jika dia ialah atau menjadi seorang bankrap;
- (c) jika dia menjadi tak sempurna akal atau selainnya tak berupaya untuk menunaikan kewajipannya;
- (d) jika dia bertindak dalam cara yang memudaratkan kepentingan Malaysia, orang awam atau pelajar; atau
- (e) jika perlantikannya di bawah subseksyen (1) dibatalkan,

mengikut mana-mana yang berkenaan.

Peraturan-peraturan mengenai pendaftaran ketua eksekutif.

32. Tanpa menjejaskan keluasan kuasa Menteri untuk membuat peraturan-peraturan, Menteri boleh membuat peraturan-peraturan tentang prosedur pendaftaran ketua eksekutif dan boleh menetapkan fee yang hendak dikenakan bagi pendaftaran itu.

Kewajipan ketua eksekutif.

33. Ketua eksekutif hendaklah, tertakluk kepada peruntukan Akta ini dan perlembagaan institusi pendidikan tinggi swasta itu, menjalankan penyeliaan am ke atas perkiraan bagi ajaran, pentadbiran, urusan hari ke hari, kebajikan dan disiplin di institusi pendidikan tinggi swasta itu.

Permohonan di bawah Akta hendaklah dibuat oleh ketua eksekutif.

34. Permohonan berhubung dengan dan bagi maksud institusi pendidikan tinggi swasta hendaklah dibuat oleh ketua eksekutif, melainkan jika diperuntukkan selainnya.

Notis, permintaan maklumat dan perhubungan hendaklah ditujukan kepada ketua eksekutif.

35. Jika—

- (a) notis dikehendaki disampaikan kepada institusi pendidikan tinggi swasta di bawah Akta ini;
- (b) apa-apa maklumat dikehendaki diberikan oleh institusi pendidikan tinggi swasta di bawah Akta ini; atau

- (c) apa-apa perhubungan lain adalah perlu antara Ketua Pendaftar dan institusi pendidikan tinggi swasta,

ia hendaklah ditujukan kepada ketua eksekutif, melainkan jika diperuntukkan selainnya.

36. Tiada seorang pun yang pernah—

- (a) menjadi anggota lembaga pengarah syarikat yang menubuhkan;
- (b) menjadi ketua eksekutif; atau
- (c) terlibat secara langsung dengan pengurusan atau perniagaan,

Orang yang tidak layak terlibat dalam pengurusan institusi pendidikan tinggi swasta.

suatu institusi pendidikan tinggi swasta yang ditutup boleh bertindak dalam sifat yang sama berkenaan dengan institusi pendidikan tinggi swasta yang lain, tanpa kelulusan Menteri.

37. (1) Sebagai tambahan kepada kuasa Ketua Pendaftar di bawah subseksyen 31(3), jika ketua eksekutif—

- (a) telah bertindak atau bercadang untuk bertindak secara yang tak munasabah berkenaan dengan penjalanan kuasa yang diberikan atau penunaian kewajipan yang dikenakan di bawah Akta ini; atau
- (b) telah tidak menunaikan kewajipan yang dikenakan ke atasnya di bawah Akta ini,

Kuasa Ketua Pendaftar untuk bertindak terhadap ketua eksekutif.

Ketua Pendaftar boleh selepas memberikan ketua eksekutif itu peluang untuk membuat representasi—

- (aa) memberikan kepada ketua eksekutif arahan secara bertulis tentang penjalanan kuasanya atau penunaian kewajipannya sebagaimana yang didapati suaimanfaat oleh Ketua Pendaftar; atau
- (bb) mengkenselkan pendaftaran ketua eksekutif.

(2) Ketua Pendaftar hendaklah memberikan ketua eksekutif notis secara bertulis tentang keputusannya untuk mengkenselkan pendaftaran ketua eksekutif itu di bawah subperenggan (1)(bb) dan keputusan itu hendaklah mula berkuatkuasa dari tarikh notis bertulis itu disampaikan kepada ketua eksekutif itu.

(3) Jika ketua eksekutif terkilán dengan keputusan Ketua Pendaftar di bawah subperenggan (1)(*bb*), dia boleh, dalam masa dua puluh satu hari dari penyampaian keputusan itu, merayu kepada Menteri.

(4) Jika pada bila-bila masa, suatu institusi pendidikan tinggi swasta, tidak mempunyai ketua eksekutif yang dilantik di bawah Akta ini maka Ketua Pendaftar boleh melantik mana-mana orang sebagai ketua eksekutif bagi tempoh sementara sehingga institusi pendidikan tinggi swasta itu melantik ketua eksekutifnya sendiri .

(5) Tempoh sementara di bawah subseksyen (4) tidak boleh melebihi tiga bulan dan orang yang dilantik sedemikian—

(*a*) tidak perlu didaftarkan; dan

(*b*) hendaklah dibayar gaji dan saraannya oleh institusi pendidikan tinggi swasta itu, dalam amaun yang ditentukan Ketua Pendaftar.

(6) Jika selepas tempoh sementara dalam subseksyen (4) habis, institusi pendidikan tinggi swasta itu tidak melantik seorang ketua eksekutif, maka pendaftaran institusi pendidikan tinggi swasta itu boleh dikenselkan oleh Ketua Pendaftar.

BAHAGIAN VII

PENGENDALIAN KURSUS PENGAJIAN DI INSTITUSI PENDIDIKAN TINGGI SWASTA

Kelulusan
terdahulu
Menteri
mengenai
kursus
pengajian
dan
gabungan,
dsb.

38. (1) Kelulusan Menteri hendaklah diperolehi terlebih dahulu sebelum sesuatu institusi pendidikan tinggi swasta—

(*a*) boleh mengendalikan sesuatu kursus pengajian atau program latihan;

(b) boleh mengendalikan sesuatu kursus pengajian atau program latihan secara bersesama atau bergabung, bersekutu atau bekerjasama dengan mana-mana Universiti, Kolej Universiti, institusi pendidikan tinggi, sama ada awam atau swasta, atau badan profesional, di dalam atau di luar Malaysia.

(2) Institusi pendidikan tinggi swasta yang melanggar peruntukan seksyen ini adalah melakukan suatu kesalahan dan apabila disabitkan, boleh didenda tidak melebihi dua ratus ribu ringgit atau dipenjarakan selama tempoh yang tidak melebihi dua tahun atau kedua-duanya.

39. Menteri tidak boleh memberikan kelulusannya di bawah seksyen 38 melainkan jika dia berpuas hati—

(a) dengan kesesuaian perkiraan berhubung dengan kemudahan pendidikan; dan

(b) dengan penjaminan kualiti kursus pengajian atau program latihan itu,

berdasarkan syor yang dibuat oleh pihak berkuasa yang ditubuhkan di bawah undang-undang bertulis bagi maksud sedemikian.

Pihak berkuasa yang menentukan cukup tidaknya kemudahan pendidikan dan penjaminan kualiti kursus pengajian.

40. (1) Apabila memberi kelulusan di bawah Bahagian ini, Menteri boleh mengenakan—

(a) syarat-syarat yang difikirkannya patut; dan

(b) fee yang ditetapkan.

Pemberian kelulusan tertakluk kepada syarat.

(2) Jika sesuatu institusi pendidikan tinggi swasta melanggar syarat yang dikenakan di bawah subseksyen (1), ia adalah melakukan suatu kesalahan dan apabila disabitkan, boleh didenda tidak melebihi lima puluh ribu ringgit atau dipenjarakan selama tempoh tidak melebihi enam bulan atau kedua-duanya.

41. (1) Semua institusi pendidikan tinggi swasta hendaklah mengendalikan kursus pengajiannya dalam bahasa kebangsaan.

Bahasa pengantar.

(2) Kursus pengajian di bawah subseksyen (1) adalah termasuk mata pelajaran yang dikehendaki supaya diajar di bawah seksyen 43.

(3) Walau apa pun subseksyen (1), institusi pendidikan tinggi swasta boleh, dengan kelulusan Menteri—

(a) mengendalikan suatu kursus pengajian atau sebahagian yang substansial suatu kursus pengajian dalam bahasa Inggeris; atau

(b) mengendalikan pengajaran agama Islam dalam bahasa Arab.

(4) Jika mana-mana kursus pengajian atau sebahagian yang substansial mana-mana kursus pengajian di mana-mana institusi pendidikan tinggi swasta dikendalikan dalam bahasa Inggeris atau Arab, bahasa kebangsaan hendaklah diajarkan sebagai mata pelajaran wajib bagi pelajar yang mengikuti kursus pengajian sedemikian dalam bahasa itu.

(5) Dalam hal pelajar yang disebutkan dalam subseksyen (4) yang merupakan warganegara Malaysia, suatu pencapaian dalam bahasa kebangsaan, pada tahap yang ditentukan oleh pihak berkuasa yang disebut dalam seksyen 39, hendaklah menjadi pra-syarat bagi penganugerahan sijil, diploma atau ijazah institusi pendidikan tinggi swasta itu.

Kuasa
Menteri
untuk
mengarahkan
supaya
bahasa
kebangsaan
digunakan.

42. (1) Berkenaan dengan kelulusan yang diberikan oleh Menteri di bawah subseksyen 38(1) Menteri boleh pada bila-bila masa selepas itu mengarahkan supaya bahasa kebangsaan digunakan untuk mengendalikan kursus pengajian tersebut.

(2) Arahan Menteri di bawah subseksyen (1)—

(a) hendaklah terpakai hanya bagi pelajar yang merupakan warganegara Malaysia bagi pengambilan baru institusi pendidikan tinggi swasta itu yang belum mula mengikuti kursus pengajian itu; dan

(b) tidaklah terpakai bagi pelajar lain yang mengikuti kursus pengajian itu melainkan jika Menteri berpuas hati bahawa arahan itu tidak akan memudaratkan mereka.

(3) Menteri boleh mengenakan syarat-syarat ke atas institusi pendidikan tinggi swasta bagi maksud melaksanakan arahnya di bawah subseksyen (1).

43. (1) Semua institusi pendidikan tinggi swasta hendaklah mengajar mata pelajaran yang berikut:

Mata pelajaran wajib.

- (a) pengajian Malaysia;
- (b) pengajian yang berhubungan dengan pengajaran agama Islam bagi pelajar yang menganut agama Islam; dan
- (c) pendidikan moral bagi pelajar bukan Islam.

(2) Mata pelajaran yang disebut dalam perenggan (1)(a) hingga (c) hendaklah diajarkan sebagai tambahan kepada mata pelajaran atau kursus pengajian lain yang diajarkan di institusi pendidikan tinggi swasta.

(3) Dalam hal pelajar yang merupakan warganegara Malaysia, kelulusan dalam mata pelajaran yang dinyatakan dalam perenggan (1)(a) hingga (c), pada tahap yang ditentukan oleh pihak berkuasa yang disebut dalam seksyen 39, hendaklah menjadi pra-syarat bagi penganugerahan sijil, diploma atau ijazah institusi pendidikan tinggi swasta.

44. (1) Semua sijil, diploma dan ijazah institusi pendidikan tinggi swasta hanya boleh dianugerahkan apabila mencapai tahap minimum yang ditentukan oleh pihak berkuasa yang disebut dalam seksyen 39.

Tahap minimum hendaklah dicapai sebelum sijil, diploma atau ijazah boleh dianugerahkan.

(2) Walau apa pun apa-apa jua peruntukan lain Akta ini, hanya suatu institusi pendidikan tinggi swasta yang bertaraf Universiti atau Kolej Universiti atau kampus cawangan boleh menganugerahkan ijazah.

Kuasa Menteri untuk membuat peraturan-peraturan bagi penyeliaan dan kawalan standard pendidikan.

45. Menteri boleh membuat peraturan-peraturan bagi penyeliaan, pengawalseliaan dan kawalan standard pendidikan di institusi pendidikan tinggi swasta mengikut tahap minimum yang ditentukan oleh pihak berkuasa yang disebut dalam seksyen 3.9.

BAHAGIAN VIII

DISIPLIN DAN TATAKELAKUAN PELAJAR

Pihak berkuasa disiplin berkenaan dengan pelajar.

46. (1) Ketua eksekutif hendaklah bertanggungjawab bagi disiplin dan tatakelakuan pelajar di institusi pendidikan tinggi swasta itu.

(2) Pada menunaikan kewajipannya di bawah subseksyen (1), ketua eksekutif hendaklah mematuhi dan melaksanakan arahan yang dikeluarkan oleh Ketua Pendaftar dari semasa ke semasa berkenaan dengan disiplin dan tatakelakuan pelajar institusi pendidikan tinggi swasta itu.

Larangan ke atas pelajar, persatuan, badan atau kumpulan pelajar yang bersekutu dengan pertubuhan, dsb.

47. (1) Perlembagaan hendaklah mengandungi larangan—

(a) ke atas seseorang, sewaktu dia merupakan pelajar institusi pendidikan tinggi swasta itu, daripada menjadi ahli atau dalam apa-apa cara bersekutu dengan suatu pertubuhan, parti politik, kesatuan sekerja atau apa-apa organisasi, badan atau kumpulan orang lain—

(i) sama ada atau tidak ia ditubuhkan di bawah mana-mana undang-undang;

(ii) sama ada ia di dalam atau di luar institusi pendidikan tinggi swasta itu; dan

(iii) sama ada ia di dalam atau di luar Malaysia;

(b) ke atas sesuatu persatuan, badan atau kumpulan pelajar institusi pendidikan tinggi swasta itu, yang bergabung, bersekutu atau mempunyai urusan lain walau apa jua pun dengan mana-mana pertubuhan, parti politik, kesatuan sekerja

atau mana-mana organisasi, badan atau kumpulan orang lain—

- (i) sama ada atau tidak ia ditubuhkan di bawah mana-mana undang-undang;
- (ii) sama ada ia di dalam atau di luar institusi pendidikan tinggi swasta itu; dan
- (iii) sama ada ia di dalam atau di luar Malaysia; dan

(c) ke atas seseorang, sewaktu dia merupakan pelajar institusi pendidikan tinggi swasta, dan sesuatu persatuan, badan atau kumpulan pelajar institusi pendidikan tinggi swasta yang menyatakan atau melakukan apa-apa perkara yang boleh dianggapkan sebagai—

- (i) menyatakan sokongan dan simpati kepada atau tentangan terhadap mana-mana parti politik atau kesatuan sekerja; atau
- (ii) menyatakan sokongan atau simpati kepada mana-mana organisasi, badan atau kumpulan orang yang tak sah.

(2) Jika pada bila-bila masa perlembagaan tidak mengandungi peruntukan di bawah subseksyen (1), Ketua Pendaftar boleh memerintahkan institusi pendidikan tinggi swasta itu memasukkan peruntukan berkenaan ke dalam perlembagaan.

(3) Jika institusi pendidikan tinggi swasta itu tidak mematuhi perintah yang dikeluarkan oleh Ketua Pendaftar di bawah subseksyen (2), Ketua Pendaftar boleh mengenselkan pendaftarannya.

(4) Seseorang pelajar yang melanggar atau tidak mematuhi peruntukan perlembagaan yang dikehendaki supaya diperuntukkan dalam perlembagaan di bawah subseksyen (1), adalah melakukan suatu kesalahan dan hendaklah apabila disabitkan didenda tidak melebihi satu ribu ringgit.

(5) Institusi pendidikan tinggi swasta hendaklah juga bertanggung bagi kesalahan di bawah subseksyen (4)—

- (a) kerana tidak mengikuti perlembagaannya; dan
- (b) apabila disabitkan boleh didenda tidak melebihi sepuluh ribu ringgit,

melainkan jika institusi pendidikan tinggi swasta itu memuaskan mahkamah—

- (aa) bahawa kesalahan itu dilakukan tanpa pengetahuan atau pembiarannya; dan
- (bb) bahawa ia telah menjalankan segala usaha yang wajar untuk mengelakkan berlakunya kesalahan itu.

(6) Sabitan institusi pendidikan tinggi swasta di bawah subseksyen (5) boleh dijadikan alasan bagi membatalkan kelulusan penubuhannya.

Tanggung
jenayah
pemegang
jawatan, dsb.
dalam
persatuan,
badan atau
kumpulan
pelajar.

48. (1) Subseksyen (2) hendaklah terpakai jika suatu kesalahan dilakukan di bawah mana-mana undang-undang bertulis—

- (a) sama ada atau tidak mana-mana orang telah disabitkan berkenaan dengannya; atau
- (b) termasuklah jika kesalahan itu telah dilakukan atau berupa dilakukan atas nama atau bagi pihak mana-mana persatuan, badan atau kumpulan pelajar institusi pendidikan tinggi swasta.

(2) Tiap-tiap pemegang jawatan persatuan, badan atau kumpulan dan tiap-tiap orang yang menguruskan atau membantu dalam pengurusan persatuan, badan atau kumpulan itu pada masa kesalahan itu dilakukan—

- (a) hendaklah disifatkan telah melakukan kesalahan itu; dan
- (b) boleh dikenakan hukuman yang ditetapkan oleh undang-undang,

melainkan jika dia memuaskan mahkamah bahawa kesalahan itu dilakukan tanpa pengetahuannya dan bahawa dia telah menjalankan segala usaha yang wajar untuk mengelakkan daripada berlakunya kesalahan itu.

(3) Seseorang pemegang jawatan, atau seseorang yang menguruskan atau membantu dalam pengurusan, sesuatu persatuan, badan atau kumpulan yang disebutkan dalam subseksyen (2), boleh didakwa di bawah seksyen ini, walau pun dia mungkin tidak terlibat dalam melakukan kesalahan itu.

(4) Dalam apa-apa pendakwaan di bawah seksyen ini, dokumen yang dijumpai berada dalam milikan—

- (a) seseorang pemegang jawatan;
- (b) seseorang yang menguruskan atau membantu dalam pengurusan; atau
- (c) seseorang anggota,

persatuan, badan atau kumpulan itu hendaklah menjadi keterangan *prima facie* mengenai kandungannya bagi maksud membuktikan bahawa apa-apa telah dilakukan atau berupa telah dilakukan oleh atau bagi pihak organisasi, badan atau kumpulan itu.

49. (1) Ketua Pendaftar boleh mengarahkan ketua eksekutif untuk menggantung atau membubarkan sesuatu persatuan, badan atau kumpulan pelajar—

- (a) jika persatuan, badan atau kumpulan itu dikendalikan mengikut cara yang difikirkan oleh Ketua Pendaftar sebagai memudaratkan atau menjejaskan—
 - (i) Malaysia;
 - (ii) ketenteraman awam; atau
 - (iii) pelajar; atau

Kuasa Ketua Pendaftar untuk mengeluarkan arahan menggantung atau membubarkan mana-mana persatuan, badan atau kumpulan pelajar.

(b) jika persatuan, badan atau kumpulan itu melanggar mana-mana peruntukan mana-mana undang-undang bertulis.

(2) Ketua Pendaftar tidak boleh memberi arahan di bawah subseksyen (1) sehinggalah selepas dia menimbangkan representasi yang dibuat oleh persatuan, badan atau kumpulan pelajar institusi pendidikan tinggi swasta itu.

(3) Ketua eksekutif hendaklah mengambil tindakan serta-merta untuk melaksanakan arahan Ketua Pendaftar dan hendaklah dalam masa dua puluh satu hari, memberitahu Ketua Pendaftar tentang apa-apa tindakan yang telah diambil oleh ketua eksekutif di bawah subseksyen (1).

(4) Jika arahan Ketua Pendaftar di bawah seksyen ini tidak dipatuhi, Ketua Pendaftar boleh mengensel pendaftaran ketua eksekutif itu atau pendaftaran institusi pendidikan tinggi swasta itu.

Peraturan-peraturan mengenai pembuangan pelajar.

50. Ketua Pendaftar boleh menetapkan, selepas berunding dengan Menteri, peraturan-peraturan bagi pembuangan pelajar dalam hal-hal tertentu.

BAHAGIAN IX

PERMIT MENGAJAR

Pengeluaran permit mengajar.

51. (1) Seseorang hendaklah mendapatkan permit mengajar yang dikeluarkan oleh Ketua Pendaftar sebelum dia boleh dibenarkan mengajar di mana-mana institusi pendidikan tinggi swasta.

(2) Permohonan bagi permit mengajar di bawah Akta ini hendaklah dibuat kepada Ketua Pendaftar dalam borang yang ditetapkan dan mengikut cara yang ditetapkan dan selepas membayar fee yang ditetapkan.

(3) Pada bila-bila masa selepas menerima permohonan bagi mendapatkan permit mengajar dan sebelum ia ditentukan, Ketua Pendaftar boleh, melalui notis secara bertulis, menghendaki pemohon memberikan maklumat, butir-butir atau dokumen tambahan, yang berbeza antara mata pelajaran yang hendak diajar oleh pemohon.

(4) Ketua Pendaftar boleh, selepas melakukan apa-apa penyiasatan yang difikirkannya perlu mengenai permohonan bagi mendapatkan permit mengajar—

(a) mengeluarkan permit mengajar dalam bentuk yang ditetapkan dan tertakluk kepada apa-apa syarat yang dinyatakan kepada orang yang memohon permit itu, dan selepas orang itu membayar fee yang ditetapkan; atau

(b) menolak permohonan itu.

(5) Suatu permit mengajar hendaklah menyatakan mata pelajaran atau mata-mata pelajaran yang boleh diajar oleh orang yang kepadanya permit mengajar itu dikeluarkan.

(6) Seseorang yang terkilan dengan keputusan Ketua Pendaftar—

(a) menolak permohonan itu; atau

(b) mengenakan syarat atas permit itu,

boleh merayu kepada Menteri dalam masa dua puluh satu hari daripada diberitahu tentang keputusan yang terhadapnya rayuan dibuat.

52. (1) Ketua Pendaftar boleh enggan mengeluarkan permit mengajar atau membatalkan permit mengajar jika dia berpuas hati bahawa orang yang memohon permit itu atau yang kepadanya permit telah dikeluarkan—

(a) tidak mempunyai kelayakan untuk mengajar, atau mempunyai kelayakan yang pada pendapat Ketua Pendaftar tidak mencukupi bagi maksud itu;

Kuasa Ketua Pendaftar untuk tidak mengeluarkan dan membatalkan permit mengajar.

- (b) membuat pernyataan yang palsu atau mengelirukan berkaitan dengan permohonannya bagi mendapatkan permit mengajar atau telah dengan sengaja menyembunyikan suatu fakta material;
 - (c) mengalami kecacatan fizikal atau mental atau penyakit yang menjadikannya seorang yang tak sesuai untuk mengajar;
 - (d) jika telah dibuktikan terhadapnya, atau dia telah disabitkan atas, suatu pertuduhan berkenaan dengan—
 - (i) kesalahan yang melibatkan fraud, ketidakjujuran atau keburukan akhlak;
 - (ii) kesalahan di bawah mana-mana undang-undang berhubung dengan rasuah; atau
 - (iii) apa-apa kesalahan lain yang boleh dihukum dengan pemenjaraan (bagi kesalahan itu sendiri atau sebagai tambahan kepada atau sebagai ganti denda) selama lebih daripada dua tahun; atau
 - (e) ialah, kerana apa-apa sebab bukan seorang yang layak dan patut untuk mengajar,
- mengikut mana-mana yang berkenaan.

(2) Jika Ketua Pendaftar enggan mengeluarkan permit mengajar atau membatalkan permit mengajar, dia hendaklah memberitahu orang yang memohon permit itu dan orang yang perमितnya dibatalkan itu, melalui notis secara bertulis, tentang keengganan atau pembatalan itu, dengan menyatakan alasan keengganan atau pembatalan itu.

(3) Seseorang yang terkilan dengan apa-apa keputusan Ketua Pendaftar di bawah seksyen ini boleh, dalam masa dua puluh satu hari dari dimaklumkan tentang keputusan itu, merayu kepada Menteri.

53. (1) Suatu permit mengajar boleh dibatalkan oleh Ketua Pendaftar selepas memberikan orang yang kepadanya ia dikeluarkan hak untuk membuat representasi.

Hak untuk membuat representasi hendaklah diberikan dan alasan tambahan bagi pembatalan.

(2) Sebagai tambahan kepada alasan yang dinyatakan di bawah perenggan 52(1)(a) hingga (e), permit mengajar boleh dibatalkan atas alasan yang berikut:

- (a) bahawa pemegang permit itu bertindak mengikut cara yang menjejaskan atau memudaratkan kepentingan Malaysia, orang awam atau pelajar; atau
- (b) apa-apa alasan lain yang difikirkan patut oleh Ketua Pendaftar.

BAHAGIAN X

PEMBATALAN KELULUSAN DAN PENGKENSELAN PENDAFTARAN

54. (1) Ketua Pendaftar boleh, di bawah arahan Menteri, menyampaikan kepada institusi pendidikan tinggi swasta suatu notis tentang niat untuk membatalkan kelulusan institusi pendidikan tinggi swasta itu jika Menteri berpuas hati bahawa adalah suaimanfaat berbuat sedemikian atas mana-mana alasan yang berikut:

Alasan bagi pembatalan kelulusan.

- (a) bahawa kelulusan institusi pendidikan tinggi swasta itu telah didapatkan melalui apa-apa pernyataan palsu atau yang mengelirukan;
- (b) bahawa telah berlaku pelanggaran mana-mana syarat yang dikenakan oleh Menteri;
- (c) bahawa tahap pendidikan di institusi pendidikan tinggi swasta itu tidak dikekalkan dengan sewajarnya;
- (d) bahawa institusi pendidikan tinggi swasta itu telah disabitkan atas suatu kesalahan di bawah Akta ini atau mana-mana undang-undang bertulis lain;

- (e) bahawa suatu kesalahan telah dilakukan di bawah Akta ini; atau
- (f) apa-apa alasan lain yang difikirkan patut oleh Menteri demi kepentingan Malaysia, orang awam atau pelajar.

(2) Alasan-alasan di bawah perenggan (1)(a) hingga (f) adalah sebagai tambahan kepada apa-apa alasan lain yang diperuntukkan di bawah mana-mana peruntukan lain dalam Akta ini.

Alasan bagi pengkensenalan pendaftaran.

55. (1) Ketua Pendaftar boleh menyampaikan kepada institusi pendidikan tinggi swasta suatu notis tentang niat untuk mengkensenalan pendaftaran institusi pendidikan tinggi swasta itu jika dia berpuas hati bahawa adalah suaimanfaat untuk berbuat sedemikian atas mana-mana alasan yang berikut:

- (a) bahawa pendaftaran institusi pendidikan tinggi swasta itu telah didapatkan melalui apa-apa pernyataan yang palsu atau mengelirukan;
- (b) bahawa telah berlaku pelanggaran mana-mana syarat yang dikenakan oleh Ketua Pendaftar;
- (c) bahawa suatu kesalahan telah dilakukan di bawah Akta ini;
- (d) bahawa institusi pendidikan tinggi swasta itu telah disabitkan atas suatu kesalahan di bawah Akta ini atau mana-mana undang-undang bertulis lain;
- (e) bahawa disiplin di institusi pendidikan tinggi swasta itu tidak dikekalkan dengan sewajarnya;
- (f) bahawa peruntukan perlembagaan institusi pendidikan tinggi swasta itu sengaja diabaikan; atau
- (g) bahawa institusi pendidikan tinggi swasta itu telah digunakan secara yang berlawanan dengan maksud penubuhannya.

(2) Alasan-alasan di bawah perenggan (1)(a) hingga (g) adalah sebagai tambahan kepada mana-mana alasan lain sebagaimana yang diperuntukkan di bawah mana-mana peruntukan lain Akta ini.

56. (1) Notis tentang niat untuk membatalkan kelulusan di bawah seksyen 54 atau untuk mengkenselkan pendaftaran di bawah seksyen 55 hendaklah menyatakan alasan yang di atasnya pembatalan kelulusan atau pengkenselan pendaftaran itu dicadangkan.

Notis untuk membatalkan kelulusan dan mengkensel pendaftaran.

(2) Institusi pendidikan tinggi swasta itu hendaklah diberikan peluang untuk membuat representasi bertulis mengenainya dalam masa dua puluh satu hari dari tarikh penyampaian notis dalam subseksyen (1).

(3) Selepas habis tempoh dua puluh satu hari yang disebutkan dalam subseksyen (2) dan selepas menimbangkan apa-apa representasi yang dibuat di bawah subseksyen itu, Ketua Pendaftar hendaklah—

(a) berkenaan dengan pengkenselan pendaftaran, memutuskan sama ada atau tidak—

(i) untuk meneruskan tindakan yang dicadangkan;

(ii) untuk tidak mengambil tindakan lanjut;

(iii) untuk menambah, menukar atau mengubah syarat-syarat pendaftaran; atau

(iv) untuk memberikan amaran; atau

(b) berkenaan dengan pembatalan kelulusan, membuat apa-apa syor kepada Menteri.

(4) Keputusan Ketua Pendaftar di bawah perenggan (3)(a) untuk mengkenselkan pendaftaran institusi pendidikan tinggi swasta hendaklah dibuat dengan persetujuan Menteri.

Keputusan hendaklah berdasarkan dokumen dan pendengaran secara lisan tidak dibenarkan.

57. Keputusan Menteri dan Ketua Pendaftar dalam Bahagian ini hendaklah dibuat berdasarkan dokumen berhubung dengan perkara di hadapan mereka, dan tidak boleh diadakan pendengaran secara lisan mengenainya.

BAHAGIAN XI

PENUTUPAN INSTITUSI PENDIDIKAN TINGGI SWASTA

Kuasa Menteri untuk mengeluarkan arahan demi melindungi kepentingan pelajar.

58. (1) Jika atas kerelaannya sendiri seorang ketua eksekutif memberitahu Menteri atau jika daripada hasil pemeriksaan yang dibuat di bawah Bahagian XII atau atas apa-apa sebab lain Menteri berpendapat bahawa sesuatu institusi pendidikan tinggi swasta—

- (a) tidak dapat memenuhi obligasinya kepada pelajarinya;
- (b) hampir menggantung kegiatan perniagaannya; atau
- (c) sedang menjalankan aktivitinya dalam cara yang memudaratkan kepentingan Malaysia, orang awam atau pelajar,

maka Menteri boleh, tanpa menjejaskan keluasan kuasa Menteri untuk memberikan arahan di bawah seksyen 5, demi melindungi kepentingan Malaysia, orang awam dan pelajar institusi pendidikan tinggi swasta itu—

- (aa) mengarahkan supaya institusi pendidikan tinggi swasta yang berkenaan mengambil apa-apa langkah yang difikirkan patut oleh Menteri untuk membetulkan apa-apa perkara atau memperbaiki apa-apa hal keadaan;
- (bb) mengarahkan supaya seseorang atau suatu jawatankuasa dilantik, atau Menteri sendiri melantik seseorang atau suatu jawatankuasa, untuk menasihatkan ketua eksekutif tentang cara pengurusan institusi pendidikan tinggi swasta itu; atau

(cc) mengambil apa-apa tindakan yang difikirkan perlu oleh Menteri dalam hal keadaan kes itu untuk menjadikan hal-hwal institusi pendidikan tinggi swasta itu selaras dengan peruntukan Akta ini.

(2) Tiap-tiap arahan Menteri yang dibuat di bawah subseksyen (1) atau nasihat atau arahan seseorang atau sesuatu jawatankuasa yang dilantik di bawah perenggan (1)(bb) hendaklah mengikut institusi pendidikan tinggi swasta itu.

(3) Kesemua perbelanjaan yang dilakukan oleh orang atau jawatankuasa yang dilantik di bawah perenggan (1)(bb) hendaklah dibayar oleh institusi pendidikan tinggi swasta itu.

(4) Jika suatu institusi pendidikan tinggi swasta tidak mematuhi apa-apa nasihat atau arahan yang diberikan kepadanya oleh orang atau jawatankuasa yang dilantik di bawah perenggan (1)(bb), maka ketakpatuhan itu boleh dijadikan alasan untuk membatalkan kelulusannya.

59. Sesuatu institusi pendidikan tinggi swasta hendaklah menghentikan kegiatan perniagaannya dan menamatkan kursus pengajiannya jika—

Pemberhentian
kegiatan
perniagaan.

- (a) kelulusan bagi penubuhannya telah dibatalkan oleh Menteri;
- (b) pendaftarannya telah dikenselkan oleh Ketua Pendaftar;
- (c) lembaga pengarah memutuskan sedemikian;
- (d) syarikat yang dengannya institusi pendidikan tinggi swasta itu ditubuhkan telah digulung—
 - (i) oleh lembaga pengarah syarikat; atau
 - (ii) melalui perintah mahkamah; atau
- (e) institusi pendidikan tinggi swasta itu terpaksa ditutup atas apa-apa sebab lain.

Notis tentang
niat untuk
menutup.

60. (1) Sesuatu institusi pendidikan tinggi swasta yang sedang hendak menghentikan kegiatan perniagaannya kecuali atas sebab-sebab yang dinyatakan dalam perenggan 59(a) dan (b) dan subperenggan 59(d)(ii), hendaklah memberikan notis tentang niatnya untuk berbuat sedemikian sekurang-kurangnya bagi tempoh selama satu tahun kalender sebelum penutupannya.

(2) Notis di bawah subseksyen (1) hendaklah—

- (a) dibuat kepada Ketua Pendaftar oleh ketua eksekutif institusi pendidikan tinggi swasta itu;
- (b) disampaikan melalui surat berdaftar Akuan Terima kepada pelajar institusi pendidikan tinggi swasta itu; dan
- (c) disiarkan dalam akhbar, sekurang-kurangnya satu dalam bahasa kebangsaan dan satu lagi dalam apa-apa bahasa lain.

(3) Jika penutupan institusi pendidikan tinggi swasta adalah atas sebab dalam perenggan 59(a) dan (b) dan subperenggan 59(d)(ii), maka institusi pendidikan tinggi swasta itu hendaklah dalam masa dua puluh satu hari selepas diberitahu tentang keputusan Menteri untuk membatalkan kelulusannya, keputusan Ketua Pendaftar untuk mengkenselkan pendaftarannya atau perintah mahkamah supaya syarikat digulung, mengikut mana-mana yang berkenaan—

- (a) menyampaikan notis penutupannya kepada pelajarnya melalui surat berdaftar Akuan Terima; dan
- (b) menyiarkan notis penutupannya dalam akhbar, sekurang-kurangnya satu dalam bahasa kebangsaan dan satu lagi dalam apa-apa bahasa lain.

(4) Jika penutupan institusi pendidikan tinggi swasta itu ialah kerana alasan dalam perenggan 56(e), ketua eksekutif hendaklah meminta arahan daripada Ketua Pendaftar berkenaan dengan pemberitahuan penutupannya.

(5) Institusi pendidikan tinggi swasta yang melanggar seksyen ini adalah melakukan suatu kesalahan dan apabila disabitkan, boleh didenda tidak melebihi satu ratus ribu ringgit atau dipenjarakan selama tempoh tidak melebihi satu tahun atau kedua-duanya.

61. Apabila institusi pendidikan tinggi swasta ditutup, lembaga pengarah hendaklah—

Perkiraan bagi penerusan pendidikan pelajar.

- (a) membuat apa-apa perkiraan yang tidak memudaratkan atau menjejaskan kepentingan, kebajikan atau hasrat pelajar, sebagaimana yang perlu, bagi penerusan pendidikan pelajar institusi pendidikan tinggi swasta itu;
- (b) memberitahu Ketua Pendaftar tentang perkiraan yang dibuat di bawah perenggan (a);
- (c) mendapatkan kelulusan Ketua Pendaftar sebelum melaksanakan perkiraan itu; dan
- (d) memberitahu Ketua Pendaftar tentang penyelesaian perkiraan itu setelah perkiraan itu dimuktamadkan.

62. Apabila suatu institusi pendidikan tinggi swasta ditutup, ketua eksekutif hendaklah memulangkan perakuan pendaftarannya dan perakuan pendaftaran institusi pendidikan tinggi swasta itu kepada Ketua Pendaftar.

Pemulangan perakuan.

BAHAGIAN XII

PEMERIKSAAN INSTITUSI PENDIDIKAN TINGGI SWASTA

63. Ketua Pendaftar hendaklah, dari semasa ke semasa, memeriksa atau menyebabkan diperiksa institusi pendidikan tinggi swasta yang didaftarkan di bawah Akta ini bagi maksud memastikan bahawa Akta ini dan peraturan-peraturan yang dibuat di bawah Akta ini telah dan sedang dipatuhi.

Pemeriksaan hendaklah dibuat dari semasa ke semasa.

Kuasa Ketua
Pendaftar
semasa
memeriksa
institusi
pendidikan
tinggi swasta.

64. Dalam menjalankan pemeriksaan di bawah seksyen
63, Ketua Pendaftar boleh—

(a) memasuki—

(i) mana-mana kawasan termasuklah bangunan atau struktur di atasnya yang dipunyai atau digunakan oleh, sama ada secara tetap atau selainnya, atau sama ada didaftarkan atau tidak bagi kegunaan, institusi pendidikan tinggi swasta; atau

(ii) mana-mana premis;

(b) memeriksa apa-apa buku, daftar, dokumen, bahan atau barang lain yang difikirkannya perlu;

(c) mengalihkan dan menahan apa-apa buku, daftar, dokumen, bahan atau barang lain—

(i) yang didapati olehnya boleh memudaratkan kepentingan Malaysia, orang awam atau pelajar; atau

(ii) yang pada pendapatnya, boleh dijadikan keterangan tentang suatu kesalahan yang dilakukan di bawah Akta ini; dan

(d) menghendaki mana-mana orang, sebagai anggota lembaga pengarah, ketua eksekutif, pekerja atau pelajar institusi pendidikan tinggi swasta itu, supaya mengemukakan bagi pemeriksaannya apa-apa buku, daftar, dokumen, bahan atau barang lain yang berada dalam milikan atau jagaan atau di bawah kawalannya atau yang berada dalam kuasanya untuk diberi—

(i) berhubung dengan pengurusan institusi pendidikan tinggi swasta itu; atau

(ii) berhubung dengan pengajaran yang dijalankan dalam institusi pendidikan tinggi swasta itu.

BAHAGIAN XIII

PENGUATKUASAAN DAN PENYIASATAN

- 65.** Dalam Bahagian ini, "pegawai penyiasat" ertinya— Tafsiran pegawai penyiasat.
- (a) Ketua Pendaftar, Timbalan Ketua Pendaftar, Pendaftar, Timbalan Pendaftar dan Penolong Pendaftar;
 - (b) pegawai polis yang berpangkat tidak rendah daripada Inspektor; dan
 - (c) mana-mana pegawai awam lain yang diberikuasa secara bertulis oleh Ketua Pendaftar untuk melaksanakan apa-apa kewajipan berhubungan dengan penguatkuasaan dan penyiasatan di bawah Bahagian ini sebagaimana yang dinyatakan dalam pemberikuasaan itu.
- 66.** (1) Pegawai penyiasat hendaklah mempunyai segala Kuasa pegawai penyiasat. kuasa yang perlu untuk menjalankan penyiasatan tentang kesalahan di bawah Akta ini.
- (2) Pegawai penyiasat yang menjalankan penyiasatan di bawah Akta ini boleh memasuki mana-mana tempat atau bangunan dan boleh memeriksa, membuat salinan, membuat cabutan daripada, mengalihkan dan menahan apa-apa buku, buku minit, daftar, dokumen, bahan atau barang.
- (3) Pegawai penyiasat boleh, melalui notis secara bertulis, menghendaki mana-mana orang memberikan kepadanya apa-apa buku, buku minit, daftar, dokumen barang atau bahan yang berada dalam milikan atau jagaan atau di bawah kawalan orang itu atau berada dalam kuasa orang itu untuk diberikan.
- (4) Seseorang yang—
- (a) tidak mengemukakan apa-apa buku, buku minit, daftar, dokumen, bahan atau barang yang dikehendaki oleh seseorang pegawai penyiasat; atau

- (b) menghalang atau menggendalakan seseorang pegawai penyiasat yang sedang menjalankan mana-mana kuasa di bawah seksyen ini,

adalah melakukan suatu kesalahan, dan apabila disabitkan boleh didenda tidak melebihi satu ratus ribu ringgit atau dipenjarakan selama tempoh tidak melebihi satu tahun atau kedua-duanya.

(5) Pegawai penyiasat boleh memberikan kebenaran kepada mana-mana orang untuk memeriksa buku, buku minit, daftar, dokumen, bahan atau barang yang ditahan dan diambil milik oleh pegawai penyiasat di bawah subseksyen (2) jika orang itu berhak di bawah Akta ini untuk memeriksa buku, buku minit, daftar, dokumen, bahan atau barang itu.

(6) Seksyen ini tidak boleh ditafsirkan sebagai menghadkan atau menyentuh apa-apa kuasa yang serupa yang diberikan kepada mana-mana orang di bawah mana-mana undang-undang bertulis yang lain.

Kuasa untuk
mengeledah
dan menyita.

67. (1) Jika didapati oleh Majistret, daripada maklumat bertulis yang dibuat atas sumpah dan selepas apa-apa siasatan yang difikirkannya perlu, bahawa terdapat sebab yang munasabah untuk mempercayai bahawa—

- (a) mana-mana premis telah digunakan atau sedang hendak digunakan bagi; atau
- (b) terdapat di dalam mana-mana premis keterangan yang diperlukan bagi membuktikan,

pelakuan suatu kesalahan di bawah Akta ini, maka Majistret boleh mengeluarkan waran yang memberikuasa pegawai penyiasat untuk, pada bila-bila masa yang munasabah sama ada siang atau malam dan sama ada dengan bantuan atau tanpa bantuan—

- (aa) memasuki premis itu, dengan kekerasan jika perlu; dan

- (bb) menggeledah dan menyita dan mengalihkan daripadanya apa-apa buku, buku minit, daftar, bahan, dokumen, barang atau apa-apa benda lain—
- (i) yang berkenaan dengannya suatu kesalahan telah dilakukan;
 - (ii) yang berkenaan dengannya suatu kesalahan disyaki telah dilakukan; atau
 - (iii) yang semunasabahnya dipercayai dapat dijadikan keterangan tentang pelakuan kesalahan itu.

(2) Pegawai penyiasat boleh—

- (a) memecahkan mana-mana pintu luar atau pintu dalam premis itu atau mana-mana pagar, kepungan, pintu pagar atau halangan lain ke premis itu supaya dapat masuk ke dalamnya;
- (b) mengalihkan dengan menggunakan kekerasan apa-apa halangan kepada kemasukan, penggeledahan, penyitaan atau pengalihan yang berkenaan dengannya dia mempunyai kuasa di bawah subseksyen (1) untuk melakukan; dan
- (c) menahan tiap-tiap orang yang didapatinya dalam premis itu sehingga premis itu selesai diperiksa.

68. Jika seseorang pegawai penyiasat mempunyai sebab yang munasabah untuk dipercayai bahawa disebabkan kelengahan mendapatkan waran geledah di bawah seksyen 67 maka—

Mengeledah dan menyita tanpa waran.

- (a) penyiasatan itu akan terjejas;
- (b) tujuan kemasukan itu mungkin terkecewa;
- (c) buku, buku minit, daftar, dokumen, bahan, atau apa-apa benda lain yang dicari mungkin dialihkan atau diganggu; atau
- (d) keterangan yang dicari mungkin diganggu atau dimusnahkan,

dia boleh menjalankan, di dalam dan berkenaan dengan premis itu, segala kuasa yang disebut dalam seksyen 67 secara yang sepenuhnya dan secukupnya seolah-olah dia telah diberikuasa berbuat sedemikian melalui waran yang dikeluarkan di bawah seksyen itu.

Kuasa untuk mengunci.

69. (1) Jika pegawai penyiasat mempunyai alasan yang munasabah untuk mempercayai bahawa mana-mana rumah, bangunan, premis atau tempat lain digunakan sebagai institusi pendidikan tinggi swasta—

- (a) tanpa diluluskan dan didaftarkan di bawah Akta ini; dan
- (b) dengan melanggar apa-apa syarat yang dikenakan oleh Menteri atau Ketua Pendaftar,

maka pegawai penyiasat itu boleh dengan serta-merta mengambil apa-apa langkah yang difikirkannya perlu atau dengan apa-apa cara mengunci institusi pendidikan tinggi swasta itu.

(2) Orang yang menggunakan rumah, bangunan, premis atau tempat yang telah dikunci itu sebagai institusi pendidikan tinggi swasta hendaklah—

- (a) dalam masa dua puluh satu hari dari penguncian itu mengemukakan kepada Ketua Pendaftar perakuan pendaftaran institusi pendidikan tinggi swasta itu; dan
- (b) menanggung apa-apa kos yang dilakukan berbangkit daripada tindakan itu.

(3) Kunci itu hendaklah dibuka jika—

- (a) orang itu mematuhi keperluan subseksyen (2); atau
- (b) perintah mahkamah didapatkan terhadap orang itu untuk berhenti daripada menggunakan rumah, bangunan, premis atau tempat itu sebagai institusi pendidikan tinggi swasta,

mengikut mana-mana satu yang lebih awal.

(4) Pegawai penyiasat yang melakukan tindakan di bawah seksyen ini tidaklah bertanggung bagi apa-apa kos yang berbangkit daripada tindakan yang sedemikian atau kerosakan pada rumah, bangunan, premis atau tempat yang dikunci di bawah seksyen ini melainkan jika kerosakan itu telah dilakukan dengan sengaja.

(5) Apa-apa tindakan yang dilakukan di bawah seksyen ini berkenaan dengan mana-mana rumah, bangunan, premis atau tempat lain tidaklah menghalang pendakwaan terhadap mana-mana orang yang menggunakan rumah, bangunan, premis atau tempat itu sebagai institusi pendidikan tinggi swasta secara yang berlawanan dengan Akta ini.

70. (1) Pegawai penyiasat boleh, melalui notis secara bertulis, menghendaki mana-mana orang yang tahu tentang fakta dan keadaan sesuatu kes hadir di hadapannya dan untuk diperiksa secara lisan dan hendaklah mengubah ke dalam bentuk bertulis apa-apa pernyataan yang dibuat oleh orang yang diperiksa sedemikian.

Kuasa untuk memanggil bagi tujuan pemeriksaan.

(2) Orang itu hendaklah terikat di sisi undang-undang untuk menjawab soalan-soalan berhubung dengan kes itu yang dikemukakan kepadanya oleh pegawai penyiasat dan untuk menyatakan yang benar, sama ada atau tidak pernyataan itu dibuat keseluruhannya atau sebahagiannya bagi menjawab soalan-soalan, dan tidak boleh enggan untuk menjawab apa-apa soalan atas alasan bahawa soalan itu mungkin menunjukkan bahawa dia bersalah.

(3) Sesuatu pernyataan yang dibuat oleh mana-mana orang di bawah seksyen ini hendaklah ditulis dan ditandatangani oleh orang yang membuatnya atau dicapkan dengan cap ibu jarinya, mengikut mana-mana yang berkenaan—

(a) selepas pernyataan itu dibacakan kepadanya; dan

(b) selepas dia diberikan peluang untuk membuat apa-apa pembetulan yang dimahukannya.

(4) Jika orang yang diperiksa di bawah seksyen ini enggan menandatangani atau mengecapkan cap ibu jarinya atas pernyataan itu, pegawai penyiasat hendaklah mengendorskan padanya di bawah tandatangannya hakikat keengganan itu dan sebabnya, jika ada, yang dinyatakan oleh orang yang diperiksa itu.

(5) Apa-apa pernyataan yang dibuat dan direkodkan di bawah seksyen ini boleh diterima sebagai keterangan dalam mana-mana prosiding di dalam mana-mana mahkamah.

(6) Mana-mana orang yang—

- (a) tidak hadir di hadapan seseorang pegawai penyiasat sebagaimana yang dikehendaki di bawah subseksyen (1);
- (b) enggan untuk menjawab apa-apa soalan yang dikemukakan kepadanya oleh seseorang pegawai penyiasat di bawah subseksyen (2); atau
- (c) memberikan kepada seseorang pegawai penyiasat maklumat atau pernyataan yang palsu atau mengelirukan dalam apa-apa butir material,

adalah melakukan suatu kesalahan dan apabila disabitkan boleh didenda tidak melebihi satu ratus ribu ringgit atau dipenjarakan selama tempoh tidak melebihi satu tahun atau kedua-duanya.

Tiada hak ke atas kos prosiding, kerugian atau relief lain, dsb.

71. Tiada seorang pun adalah, dalam apa-apa prosiding di hadapan mana-mana mahkamah berkenaan dengan penyitaan apa-apa jua pun yang disita atau ditahan pada menjalankan atau berupa menjalankan mana-mana kuasa yang diberikan kepadanya di bawah Bahagian ini, berhak mendapat kos prosiding itu atau apa-apa gantirugi atau relief lain, selain daripada perintah pemulangan benda yang disita atau ditahan itu, atau bayaran berdasarkan nilainya, melainkan jika penyitaan atau penahanan itu dibuat tanpa sebab yang munasabah atau berpatutan.

BAHAGIAN XIV

KESALAHAN DAN PENALTI

72. (1) Tiada seorang pun boleh menganjurkan sesuatu institusi pendidikan tinggi swasta, sama ada melalui iklan, prospektus, risalah atau selainnya, melainkan jika penubuhan institusi pendidikan tinggi swasta itu telah diluluskan di bawah Akta ini.

Larangan
tentang
pengiklanan,
dsb.

(2) Mana-mana orang yang melanggar subseksyen (1) adalah melakukan suatu kesalahan dan apabila disabitkan boleh didenda tidak melebihi lima puluh ribu ringgit atau dipenjarakan selama tempoh tidak melebihi enam bulan atau kedua-duanya.

73. (1) Jika Ketua Pendaftar berpendapat bahawa apa-apa pernyataan yang dibuat dalam mana-mana iklan berhubungan dengan sesuatu institusi pendidikan tinggi swasta adalah palsu, mengaburi mata, menyinggung perasaan atau mengelirukan, maka Ketua Pendaftar boleh, melalui notis secara bertulis, mengarahkan supaya institusi pendidikan tinggi swasta itu melakukan kesemua atau mana-mana daripada yang berikut:

Kawalan
pengiklanan.

- (a) menghentikan penerusan keluaran iklan itu;
- (b) mengubahsuaikan iklan itu mengikut cara yang dinyatakan oleh Ketua Pendaftar;
- (c) menghentikan keluaran mana-mana iklan yang keseluruhannya atau sebahagiannya adalah pengulangan iklan itu;
- (d) mengambil segala langkah yang praktik untuk menarik balik iklan itu daripada tiap-tiap dan segala penyiaran atau pemamerannya; atau
- (e) menyiarkan suatu pernyataan dalam cara yang serupa dengan iklan yang dikeluarkan pada awalnya untuk menarik balik atau mengubahsuaikan iklan itu.

(2) Ketua Pendaftar boleh mengubah, menambah kepada, menukar, membatalkan atau selainnya meminda apa-apa arahan yang dikeluarkan di bawah subseksyen (1) melalui notis secara bertulis kepada institusi pendidikan tinggi swasta yang berkenaan.

(3) Selepas pendaftaran sesuatu institusi pendidikan tinggi swasta di bawah Bahagian V, mana-mana iklan berhubungan dengan institusi pendidikan tinggi swasta itu hendaklah mengandungi nombor pendaftaran institusi pendidikan tinggi swasta itu.

(4) Mana-mana orang atau institusi pendidikan tinggi swasta yang melanggar arahan Ketua Pendaftar di bawah subseksyen (1) adalah melakukan suatu kesalahan dan apabila disabitkan boleh didenda tidak melebihi lima puluh ribu ringgit atau dipenjarakan selama tempoh tidak melebihi enam bulan atau kedua-duanya.

(5) Apa-apa tindakan yang diambil oleh Ketua Pendaftar di bawah seksyen ini tidak menjejaskan kuasa Pengawal, Timbalan Pengawal atau Penolong Pengawal Perihal Dagangan di bawah Akta Perihal Dagangan 1972.

Akta 87.

Tafsiran
pengiklanan

74. Bagi maksud seksyen 72 dan 73, "iklan" ertinya apa-apa pemberitahuan atau maklumat mengenai penubuhan institusi pendidikan tinggi swasta—

(a) yang disiarkan dalam mana-mana akhbar, jurnal atau majalah atau apa-apa bentuk lain;

(b) yang dipamerkan pada mana-mana papan iklan, papan, bumbung, dinding, paling, pagar, rangka, papan tanda, plat, kain rentang, palang, batang tiang, tonggak, tuangan dawai atau binaan, struktur atau rekaan lain;

(c) yang disampaikan melalui filem dalam pengertian Akta Filem Wayang Gambar (Penapisan) 1952 atau melalui alat terima radio atau alat terima televisyen dalam pengertian Peraturan-Peraturan Telekom (Alat Terima Televisyen) 1964; atau

Akta 35.

P.W. 69/64.

- (d) yang disampaikan melalui cara lain, secara lisan atau tulisan dan sama ada daripada bentuk yang sama atau tidak sebagaimana yang dinyatakan dalam perenggan (a) hingga (c).

75. Mana-mana orang yang membuat pernyataan yang palsu atau mengelirukan semasa mempromosikan sesuatu institusi pendidikan tinggi swasta adalah melakukan kesalahan dan apabila disabitkan boleh didenda tidak melebihi lima puluh ribu ringgit atau dipenjarakan selama tempoh tidak melebihi enam bulan atau kedua-duanya.

Kesalahan dan penalti berhubungan dengan pernyataan yang palsu atau mengelirukan.

76. (1) Tiada seorang pun boleh—

Penubuhan institusi pendidikan tinggi swasta, dsb., dilarang melainkan jika mengikut Akta.

- (a) menubuhkan, mendirikan, menganjurkan atau menjalankan apa-apa aktiviti bagi maksud menubuhkan, mendirikan atau menganjurkan atau ke arah penubuhan, pendirian, atau penganjuran sesuatu institusi pendidikan tinggi swasta;

- (b) mengendalikan, menguruskan atau menyenggarakan apa-apa kelas bagi pengajaran dan pembelajaran pendidikan tinggi di sesuatu institusi pendidikan tinggi swasta; atau

- (c) menubuhkan, mendirikan, menganjurkan, mengendalikan, menguruskan atau menyenggarakan sesuatu institusi pendidikan tinggi swasta dengan menggunakan perkataan "Universiti", "Kolej Universiti" atau "kampus cawangan",

kecuali dengan mengikut peruntukan Akta ini.

(2) Mana-mana orang yang melanggar subseksyen (1) adalah melakukan suatu kesalahan dan apabila disabitkan boleh didenda tidak melebihi dua ratus ribu ringgit atau dipenjarakan selama tempoh tidak melebihi dua tahun atau kedua-duanya.

77. Sesuatu institusi pendidikan tinggi swasta yang mengeluarkan atau menganugerahkan kepada mana-mana orang apa-apa sijil, diploma atau ijazah secara yang berlawanan dengan peruntukan seksyen 44 adalah melakukan suatu kesalahan dan apabila disabitkan boleh didenda tidak melebihi dua ratus ribu ringgit atau dipenjarakan selama tempoh tidak melebihi dua tahun atau kedua-duanya.

Kesalahan dan penalti berhubungan dengan penganugerahan sijil, diploma dan ijazah.

Penalti kerana pelanggaran syarat.

78. Mana-mana institusi pendidikan tinggi swasta yang melanggar mana-mana syarat yang dikenakan atas kelulusan bagi penubuhannya dan pendaftarannya, adalah melakukan suatu kesalahan dan apabila disabitkan boleh didenda tidak melebihi lima puluh ribu ringgit atau dipenjarakan selama tempoh tidak melebihi enam bulan atau kedua-duanya.

Kesalahan dan penalti berhubungan dengan permohonan yang dibuat di bawah Akta.

79. Mana-mana—

- (a) pemohon yang, semasa membuat permohonan untuk mendapatkan kelulusan bagi penubuhan suatu institusi pendidikan tinggi swasta; atau
- (b) institusi pendidikan tinggi swasta yang, semasa membuat apa-apa permohonan,

di bawah Akta ini, membuat pernyataan yang diketahuinya adalah palsu atau yang dia atau ia percaya adalah tidak benar atau sengaja menyembunyikan apa-apa fakta yang material, atau memberikan apa-apa maklumat yang mengelirukan adalah melakukan suatu kesalahan dan apabila disabitkan boleh didenda tidak melebihi dua ratus ribu ringgit atau dipenjarakan selama tempoh tidak melebihi dua tahun atau kedua-duanya.

Kesalahan dan penalti berhubungan dengan aktiviti tak sah.

80. Mana-mana—

- (a) orang yang, sebagai pemunya atau penghuni mana-mana rumah, bangunan, premis atau tempat, telah tidak mengambil langkah yang munasabah untuk mengelakkan rumah, bangunan, premis atau tempat itu daripada digunakan sebagai institusi pendidikan tinggi swasta secara yang berlawanan dengan Akta ini; atau
- (b) institusi pendidikan tinggi swasta yang digunakan—
 - (i) bagi apa-apa aktiviti atau maksud yang tak sah; atau
 - (ii) bagi apa-apa aktiviti atau maksud sesuatu organisasi, pertubuhan atau kumpulan orang yang tak sah,

adalah melakukan suatu kesalahan dan apabila disabitkan boleh didenda tidak melebihi dua ratus ribu ringgit atau dipenjarakan selama tempoh tidak melebihi dua tahun atau kedua-duanya.

81. (1) Jika—

- (a) sesuatu institusi pendidikan tinggi swasta tidak menyebabkan dipamerkan salinan perakuan pendaftaran institusi pendidikan tinggi swasta itu mengikut peruntukan subseksyen 26(2);
- (b) apabila sesuatu institusi pendidikan tinggi swasta ditutup, ketua eksekutif itu tidak memulangkan kepada Ketua Pendaftar perakuan pendaftarannya dan perakuan pendaftaran institusi pendidikan tinggi swasta itu;
- (c) mana-mana orang bekerja atau menjadi guru di institusi pendidikan tinggi swasta yang tidak diluluskan dan didaftarkan di bawah Akta ini;
- (d) ketua eksekutif sesuatu institusi pendidikan tinggi swasta tidak didaftarkan di bawah Akta ini;
- (e) seseorang mengajar di institusi pendidikan tinggi swasta tanpa permit mengajar; atau
- (f) sesuatu institusi pendidikan tinggi swasta mengambil kerja seorang ketua eksekutif yang tidak didaftarkan di bawah Akta ini atau seorang guru yang tidak dikeluarkan kepadanya permit mengajar di bawah Akta ini,

Kesalahan dan penalti berhubung dengan perakuan pendaftaran dan perbuatan mengajar di institusi pendidikan tinggi swasta.

maka institusi pendidikan tinggi swasta atau ketua eksekutif atau orang itu, adalah melakukan suatu kesalahan dan apabila disabitkan boleh didenda tidak melebihi sepuluh ribu ringgit atau dipenjarakan selama tempoh tidak melebihi satu bulan atau kedua-duanya.

(2) Dalam hal suatu kesalahan di bawah perenggan (1)(c) hingga (f), adalah menjadi suatu pembelaan bagi seseorang atau seseorang ketua eksekutif atau sesuatu institusi pendidikan tinggi swasta jika dia atau ia membuktikan bahawa setelah mengambil segala langkah

berjaga-jaga yang munasabah bagi mengelakkan daripada melakukan kesalahan yang sedemikian, dia atau ia tidak tahu atau tidak mempunyai apa-apa alasan yang munasabah untuk mengesyaki bahawa—

- (a) institusi pendidikan tinggi swasta itu tidak diluluskan atau didaftarkan;
- (b) ketua eksekutif itu tidak didaftarkan sedemikian; atau
- (c) orang itu tidak mempunyai permit mengajar,

mengikut mana-mana yang berkenaan.

Penalti am. **82.** Seseorang yang melakukan suatu kesalahan di bawah Akta ini yang berkenaan dengannya tiada penalti diperuntukkan dengan nyata, apabila disabitkan boleh didenda tidak melebihi lima ribu ringgit.

Penalti dalam hal kesalahan yang berterusan. **83.** Seseorang yang melakukan suatu kesalahan di bawah Akta ini hendaklah, dalam hal kesalahan yang berterusan, sebagai tambahan kepada apa-apa penalti lain yang boleh dikenakan ke atasnya di bawah Akta ini berkenaan dengan kesalahan itu, didenda tidak melebihi lima ratus ringgit bagi setiap hari kesalahan itu berterusan selepas sabitan.

Kesalahan oleh pertubuhan perbadanan. **84.** Jika suatu pertubuhan perbadanan melakukan suatu kesalahan di bawah Akta ini—

- (a) mana-mana orang yang, pada masa kesalahan itu dilakukan merupakan pengarah, pengurus, setiausaha, atau pegawai yang seumpamanya bagi pertubuhan perbadanan itu, boleh didakwa secara berasingan atau bersejajarnya dalam prosiding yang sama dengan pertubuhan perbadanan itu; dan
- (b) tiap-tiap pengarah, pengurus, setiausaha atau pegawai yang seumpamanya bagi pertubuhan perbadanan itu, yang dalam apa-apa cara, melalui perbuatan atau peninggalan secara langsung atau tak langsung terlibat dengan atau menjadi pihak dalam pelakuan kesalahan itu hendaklah disifatkan telah melakukan kesalahan itu,

melainkan jika dia membuktikan bahawa kesalahan itu telah dilakukan tanpa pengetahuannya atau pembiarannya atau bahawa dia telah mengambil segala langkah berjaga-jaga yang munasabah atau bahawa dia telah mengambil segala usaha yang wajar bagi mengelakkan kesalahan itu daripada berlaku.

85. (1) Jika suatu kesalahan terhadap mana-mana peruntukan Akta ini telah dilakukan oleh suatu institusi pendidikan tinggi swasta atau mana-mana orang yang pada masa kesalahan itu dilakukan—

Tanggungjawab, dll. bagi kesalahan yang dilakukan oleh institusi pendidikan tinggi swasta yang ditubuhkan olehnya.

- (a) ialah anggota lembaga pengarah;
- (b) ialah pengurus;
- (c) ialah setiausaha;
- (d) memegang jawatan atau kedudukan yang serupa dengan pengurus atau setiausaha syarikat yang menubuhkan institusi pendidikan tinggi swasta itu;
- (e) ialah ketua eksekutif;
- (f) ialah kerani;
- (g) ialah pengkhidmat; atau
- (h) ialah ejen,

institusi pendidikan tinggi swasta itu,

hendaklah disifatkan telah melakukan kesalahan itu.

(2) Maka hendaklah menjadi suatu pembelaan bagi mana-mana orang yang didakwa menurut subseksyen (1) jika dia membuktikan—

- (a) bahawa kesalahan itu telah dilakukan tanpa pengetahuannya atau pembiarannya; atau

(b) bahawa dia telah—

- (i) mengambil segala langkah berjaga-jaga yang munasabah; dan
- (ii) menjalankan segala usaha yang wajar,

bagi mengelakkan kesalahan itu daripada berlaku, sebagaimana yang sepatutnya diambil dan dijalankan olehnya, dengan mengambil kira sifat fungsinya dalam kapasiti itu dan segala hal keadaan.

(3) Institusi pendidikan tinggi swasta yang boleh dikenakan hukuman atau penalti di bawah Akta ini bagi apa-apa perbuatan atau peninggalan hendaklah bertanggung bagi hukuman atau penalti yang sama bagi apa-apa perbuatan atau peninggalan sedemikian yang dilakukan oleh—

- (a) ejen yang bertindak bagi pihaknya; atau
- (b) kerani atau pengkhidmat yang bertindak semasa dalam penggajian institusi pendidikan swasta itu.

(4) Seseorang pekongsi, ejen, kerani atau pengkhidmat, atau kerani atau pengkhidmat pekongsi atau ejen itu, tidaklah terlepas daripada pendakwaan di bawah seksyen ini.

Kuasa untuk
meng-
kompaun.

86. (1) Ketua Pendaftar boleh, dengan kebenaran bertulis Pendakwa Raya, mengkompaun apa-apa kesalahan yang dilakukan oleh institusi pendidikan tinggi swasta atau seseorang di bawah Akta ini atau peraturan-peraturan yang dibuat di bawah Akta ini, yang ditetapkan sebagai kesalahan yang boleh dikompaun.

(2) Tawaran bertulis hendaklah dibuat kepada orang itu untuk mengkompaun kesalahan itu dengan membayar kepada Ketua Pendaftar apa-apa jumlah wang yang dinyatakan, yang tidak melebihi lima puluh peratus denda maksimum yang boleh dikenakan kepada orang itu jika dia disabitkan atas kesalahan itu, dalam masa apa-apa tempoh yang dinyatakan dalam tawaran itu.

(3) Tawaran di bawah subseksyen (2) boleh dibuat pada bila-bila masa selepas kesalahan itu dilakukan, tetapi sebelum apa-apa pendakwaan baginya dimulakan.

(4) Jika suatu kesalahan telah dikompaun—

- (a) tiada prosiding selanjutnya boleh diambil dan tiada pendakwaan boleh dimulakan terhadap orang yang kepadanya tawaran kompaun telah dibuat; dan
- (b) apa-apa barang, buku, buku minit, daftar, dokumen, bahan atau barang lain yang disita berkaitan dengan kesalahan itu, boleh dilepaskan tertakluk kepada syarat yang boleh dikenakan selaras dengan syarat kompaun.

(5) Apa-apa wang yang diterima oleh Ketua Pendaftar di bawah seksyen ini hendaklah dibayar ke dalam dan menjadi sebahagian daripada Kumpulan Wang Disatukan Persekutuan.

(6) Jika amaun yang dinyatakan dalam tawaran kompaun tidak dibayar dalam masa yang dinyatakan dalam tawaran itu, atau dalam apa-apa tempoh lanjutan yang diberikan oleh Ketua Pendaftar, maka pendakwaan bagi kesalahan itu boleh dimulakan pada bila-bila masa selepas itu terhadap orang yang kepadanya tawaran itu dibuat.

87. (1) Tertakluk kepada subseksyen (3), Ketua Pendaftar, Timbalan Ketua Pendaftar, Pendaftar, Timbalan Pendaftar, Penolong Pendaftar atau seorang pegawai polis yang berpangkat tidak rendah daripada Inspektor, hendaklah diberikuasa untuk hadir di dalam mahkamah—

Memulakan dan menjalankan pendakwaan.

- (a) bagi menjalankan apa-apa pendakwaan berkenaan dengan suatu kesalahan di bawah Akta ini; atau
- (b) bagi maksud apa-apa prosiding undang-undang yang lain di bawah Akta ini.

(2) Dalam hal Timbalan Ketua Pendaftar, Pendaftar, Timbalan Pendaftar atau Penolong Pendaftar, pemberikuasaan itu adalah tertakluk kepada kelulusan Ketua Pendaftar.

(3) Pendakwaan berkenaan dengan kesalahan di bawah Akta ini tidak boleh dimulakan atau dijalankan tanpa kebenaran bertulis Pendakwa Raya.

BAHAGIAN XV

PERATURAN-PERATURAN

Kuasa Menteri untuk membuat peraturan-peraturan.

88. (1) Tanpa menjejaskan kuasanya untuk membuat peraturan-peraturan di bawah mana-mana peruntukan lain dalam Akta ini, Menteri boleh membuat peraturan-peraturan bagi maksud melaksanakan peruntukan Akta ini.

(2) Tanpa menjejaskan keluasan kuasa yang diberikan dalam subseksyen (1), Menteri boleh membuat peraturan-peraturan bagi atau berkenaan dengan kesemua atau mana-mana perkara yang berikut:

- (a) borang yang hendaklah digunakan dan maklumat yang hendaklah diberikan dalam apa-apa permohonan atau bagi apa-apa maksud lain di bawah Akta ini;
- (b) prosedur yang hendaklah diikuti dan fee yang difikirkan patut ditetapkan berkenaan dengan apa-apa permohonan di bawah Akta ini atau berkenaan dengan apa-apa perakuan, permit atau dokumen lain yang dikeluarkan di bawah Akta ini;
- (c) bentuk yang dalamnya suatu daftar atau rekod lain hendaklah disimpan atau disenggarakan di bawah Akta ini, catatan yang hendaklah dibuat dalamnya, peruntukan bagi pemeriksaan dan pengambilan cabutan daripadanya dan petnberian salinannya dan fee yang hendaklah dibayar bagi pemeriksaan, cabutan dan salinan itu masing-masingnya;

- (d) pengendalian kursus-kursus pengajian;
- (e) prosedur yang hendaklah diikuti bagi pengendorsan, perubahan atau pindaan perakuan pendaftaran, permit mengajar atau apa-apa dokumen lain yang dikeluarkan di bawah Akta ini dan penggantian perakuan, permit atau dokumen lain yang hilang atau rosak;
- (f) kemudahan pendidikan yang hendaklah disediakan oleh institusi pendidikan tinggi swasta;
- (g) pengadaan pendidikan jarak jauh;
- (h) piawai kesihatan dan keselamatan, dan kegunaan yang hendaklah dipatuhi bagi premis institusi pendidikan tinggi swasta, dan menetapkan piawai dan kegunaan yang berlainan, bagi apa-apa perihal institusi pendidikan tinggi swasta, sebagaimana yang dinyatakan dalam peraturan-peraturan;
- (i) mata pelajaran wajib lain yang hendaklah diajarkan selain daripada yang dinyatakan dalam seksyen 42 dan 43;
- (j) prosedur yang hendaklah diikuti berkenaan dengan rayuan kepada Menteri daripada keputusan Ketua Pendaftar;
- (k) rekod yang hendaklah disimpan oleh institusi pendidikan tinggi swasta dan penyata yang hendaklah dibuat termasuklah rekod dan penyata kewangan;
- (l) menentukan fee yang hendaklah dikenakan ke atas pelajar institusi pendidikan tinggi swasta;
- (m) fee yang dikehendaki ditetapkan di bawah Akta ini selain daripada fee yang disebut dalam perenggan (b) dan (c);
- (n) cara bagaimana gabungan, persekutuan atau kerjasama antara institusi-institusi pendidikan tinggi swasta boleh dijalankan;

- (o) menetapkan kesalahan yang boleh dikompaun;
- (p) apa-apa perkara lain yang dikehendaki ditetapkan di bawah Akta ini; dan
- (q) apa-apa perkara lain yang Menteri fikirkan adalah suaimanfaat atau perlu bagi maksud Akta ini.

(3) Peraturan-peraturan yang dibuat di bawah seksyen ini boleh memperuntukkan bahawa pelanggaran mana-mana peruntukan dalam peraturan-peraturan itu adalah suatu kesalahan dan bahawa kesalahan sedemikian boleh dihukum, apabila disabitkan, dengan hukuman denda atau pemenjaraan atau kedua-duanya tetapi tidak boleh membuat peruntukan supaya denda itu melebihi sepuluh ribu ringgit atau tempoh pemenjaraan itu melebihi satu bulan.

BAHAGIAN XVI

AM

Membezakan antara ras dan kepercayaan dilarang.

89. (1) Tertakluk kepada peruntukan Perkara 153 Perlembagaan Persekutuan, keanggotaan institusi pendidikan tinggi swasta, sama ada sebagai pegawai, guru atau pelajar, hendaklah dibuka kepada semua orang tanpa mengira jantina, ras, agama, bangsa atau kelas.

(2) Tiada ujian mengenai agama yang dianuti atau kepercayaan boleh diadakan atau dipaksakan untuk membolehkan seseorang berhak diterima sebagai anggota sedemikian atau untuk dianugerahkan apa-apa ijazah, diploma atau sijil atau fellowship, biasiswa, bantuan, dermasiswa, pingat, hadiah, atau kepujian atau penganugerahan lain boleh dihadkan bagi orang daripada mana-mana ras, agama, bangsa atau kelas tertentu.

Indemniti dan perlindungan daripada guaman dan prosiding undang-undang.

90. Tiada tindakan boleh diambil atau pendakwaan boleh dibawa, dimulakan atau dibuat terhadap Kerajaan, Menteri, Ketua Pendaftar, Timbalan Ketua Pendaftar, Pendaftar, Timbalan Pendaftar atau Penolong Pendaftar atau terhadap mana-mana pegawai Kerajaan atau mana-mana orang yang bertindak di bawah arahan Menteri atau Ketua Pendaftar,

di dalam mana-mana mahkamah bagi apa-apa perkara yang dilakukan atau ditinggalkan daripada dilakukan di bawah Akta ini—

- (a) dengan suci hati;
- (b) dengan semunasabahnya mempercayai bahawa perkara itu perlu bagi maksud yang diniatkan untuk dicapai melaluinya; atau
- (c) bagi melaksanakan peruntukan Akta ini.

91. Tiap-tiap orang yang dilantik, atau yang secara sah menjalankan kuasa seseorang yang dilantik di bawah Akta ini, hendaklah disifatkan sebagai pengkhidmat awam mengikut pengertian Kanun Keseksaan.

Pegawai disifatkan sebagai pengkhidmat awam.
N.M.B.
Bab 45.

92. (1) Menteri boleh, jika difikirkannya wajar dan demi kepentingan sesuatu institusi pendidikan tinggi swasta atau demi kepentingan pelajar atau orang awam, melalui perintah yang disiarkan dalam *Warta*, mengecualikan institusi pendidikan tinggi swasta itu daripada mana-mana peruntukan Akta ini.

Kuasa Menteri untuk mengecualikan.

(2) Pengecualian yang diberikan di bawah subseksyen (1) adalah tertakluk kepada apa-apa syarat yang dinyatakan oleh Menteri dalam perintah itu.

(3) Kuasa mengecualikan di bawah subseksyen (1) tidaklah termasuk peruntukan tentang kelulusan bagi penubuhan institusi pendidikan tinggi swasta dan pendaftarannya, dan peruntukan seksyen 38 dan 39.

(4) Menteri boleh, pada bila-bila masa, menggunakan budi bicaranya membatalkan pengecualian di bawah seksyen ini atau mengubah atau menambah kepada syarat pengecualian itu.

93. (1) Anggota lembaga pengarah, ketua eksekutif atau mana-mana orang yang bertanggungjawab bagi pengurusan sesuatu institusi pendidikan tinggi swasta hendaklah memastikan bahawa pada sepanjang masa premis institusi pendidikan tinggi swasta itu mematuhi apa-apa piawai yang ditetapkan di bawah Akta ini.

(2) Walau apa pun subseksyen (1), jika Menteri berpuas hati berkenaan dengan mana-mana institusi pendidikan tinggi swasta bahawa setelah mengambil kira—

(a) keadaan tapaknya;

(b) mana-mana bangunan yang sedia ada di atas tapak itu; atau

(c) hal keadaan tertentu yang lain yang menyentuh premis itu,

adalah tidak munasabah dalam keadaan yang sedemikian untuk menghendaki institusi pendidikan tinggi swasta itu mematuhi keperluan dalam peraturan-peraturan mengenainya dalam apa-apa aspek tertentu, maka Menteri boleh mengarahkan supaya premis itu disifatkan mematuhi piawai yang ditetapkan jika sebagai ganti pematuhan kepada piawai yang ditetapkan itu, premis itu mematuhi apa-apa kehendak lain yang ditentukan dalam arahan itu.

Penyampaian. **94.** (1) Apa-apa notis, perintah, dokumen atau perhubungan lain yang dikehendaki diberikan atau disampaikan di bawah Akta ini kepada institusi pendidikan tinggi swasta boleh, melainkan jika cara penyampaian yang lain ditetapkan, dihantar melalui pos berdaftar.

(2) Maka hendaklah disifatkan bahawa notis, perintah, dokumen atau apa-apa perhubungan itu telah disampaikan pada hari yang berikutan hari notis, perintah, dokumen atau perhubungan itu sepatutnya diterima dalam perjalanan biasa pos.

(3) Jika seseorang yang kepadanya suatu surat berdaftar di bawah subseksyen (1) dialamatkan, diberitahu hakikat tentang adanya surat berdaftar yang menantinya di pejabat pos dan jika orang itu enggan atau mengabaikan untuk mengambil surat berdaftar itu maka notis, perintah, dokumen atau perhubungan itu hendaklah disifatkan telah disampaikan kepadanya pada tarikh yang dia dimaklumkan sedemikian.

- 95.** Akta ini tidak terpakai bagi—
- (a) institusi pendidikan yang ditubuhkan oleh Menteri di bawah atau disifatkan telah ditubuhkan di bawah Akta Pendidikan 1996;
 - (b) institusi yang ditubuhkan di bawah Akta Institut Teknologi MARA 1976;
 - (c) Universiti atau Kolej Universiti yang ditubuhkan di bawah Akta Universiti dan Kolej Universiti 1971; atau
 - (d) institusi pendidikan yang ditubuhkan di bawah mana-mana undang-undang bertulis lain.

BAHAGIAN XVII

PERUNTUKAN KECUALIAN DAN PERALIHAN

- 96.** (1) Peraturan-Peraturan Perlu (Yayasan Pengajian Tinggi) 1969 adalah dibatalkan.
- (2) Walau apa pun subseksyen (1), semua institusi pendidikan tinggi swasta—
- (a) yang ditubuhkan di bawah Peraturan-Peraturan Perlu (Yayasan Pengajian Tinggi) 1969; atau
 - (b) yang didaftarkan atau disifatkan telah didaftarkan di bawah Akta Pendidikan 1996,

Peruntukan kecualian dan peralihan berhubung dengan institusi pendidikan tinggi swasta yang sedia ada. *P.U. (A) 234/69.*

Akta .

hendaklah, pada tarikh mula berkuatkuasanya Akta ini, disifatkan telah diluluskan, ditubuhkan dan didaftarkan di bawah Akta ini.

(3) Syarat yang dikenakan ke atas institusi pendidikan tinggi swasta yang disebut dalam perenggan (2)(a) dan (b), sebelum mula berkuatkuasanya Akta ini, hendaklah terus berkuatkuasa sehingga diubah atau dibatalkan oleh Menteri.

(4) Peruntukan Akta ini hendaklah terpakai bagi institusi pendidikan tinggi swasta itu seolah-olah institusi pendidikan tinggi swasta itu telah diluluskan, ditubuhkan dan didaftarkan di bawah Akta ini.

Penukaran
perakuan
pendaftaran
sementara.
Akta .

97. (1) Perakuan pendaftaran sementara yang dikeluarkan atau disifatkan telah dikeluarkan kepada suatu institusi pendidikan tinggi swasta di bawah Akta Pendidikan 1996, hendaklah ditukarkan menjadi dan disifatkan menjadi suatu perakuan pendaftaran yang dikeluarkan di bawah Akta ini.

(2) Sebagai tambahan kepada syarat yang boleh dikenakan di bawah mana-mana peruntukan Akta ini, institusi pendidikan tinggi swasta itu hendaklah juga mematuhi apa-apa syarat lain yang boleh dikenakan oleh Ketua Pendaftar, dari semasa ke semasa.

Kuasa
Menteri
untuk
membuat
peruntukan
peralihan
tambahan.

98. (1) Menteri boleh, melalui kaedah-kaedah, membuat apa-apa peruntukan yang difikirkannya perlu atau suaimanfaat bagi maksud menghapuskan apa-apa kesukaran yang ditimbulkan oleh pemakaian Akta ini bagi institusi pendidikan tinggi swasta—

P.U. (A)
234/69.

(a) yang ditubuhkan di bawah Peraturan-Peraturan Perlu (Yayasan Pengajian Tinggi) 1969;

Akta .

(b) yang didaftarkan atau disifatkan telah didaftarkan di bawah Akta Pendidikan 1996; dan

Akta .

(c) yang kepadanya perakuan pendaftaran sementara telah dikeluarkan atau disifatkan telah dikeluarkan di bawah Akta Pendidikan 1996.

(2) Kuasa Menteri di bawah subseksyen (1) hendaklah termasuk kuasa untuk membuat apa-apa ubahsuaian bagi melaksanakan peruntukan Akta ini.

99. (1) Seseorang yang, pada tarikh mula berkuatkuasanya Akta ini, sedang bekerja dengan suatu institusi pendidikan tinggi swasta sebagai guru sama ada secara sepenuh masa atau sambilan—

Peruntukan peralihan berhubung dengan guru.

(a) yang berdaftar sebagai guru atau disifatkan telah berdaftar sebagai guru di bawah Akta Pendidikan 1996 hendaklah, dalam masa satu bulan dari tarikh mula berkuatkuasanya Akta ini; atau

Akta

(b) yang telah dikeluarkan kepadanya atau disifatkan telah dikeluarkan kepadanya permit mengajar di bawah Akta Pendidikan 1996 hendaklah—

Akta

(i) dalam masa satu bulan sebelum permit itu habis tempoh; atau

(ii) dalam masa satu bulan dari tarikh mula berkuatkuasanya Akta ini,

mengikut mana-mana satu yang terkemudian,

memohon untuk mendapatkan permit mengajar di bawah Bahagian IX Akta ini.

(2) Sementara menanti permohonan bagi mendapatkan permit mengajar yang disebut di bawah subseksyen (1) diputuskan, orang itu boleh terus mengajar di institusi pendidikan tinggi swasta itu dan hendaklah dalam hal keadaan itu disifatkan mengajar secara sah.

(3) Surat akuan terima yang dikeluarkan oleh Ketua Pendaftar berkenaan dengan permohonan untuk mendapatkan permit mengajar di bawah seksyen ini hendaklah menjadi bukti yang mencukupi tentang pembuatan permohonan itu.

HURAIAN

Akta Institusi Pendidikan Tinggi Swasta 1996 ("Akta") yang dicadangkan ini diadakan bagi mengawalselia penubuhan, pendaftaran, pengurusan dan penyeliaan, dan kawalan kualiti pendidikan yang disediakan oleh, institusi pendidikan tinggi swasta.

BAHAGIAN I

2. *Bahagian I* mengandungi peruntukan-peruntukan mengenai permulaan dan pentafsiran,

BAHAGIAN II

3. *Bahagian II* bertujuan mengadakan peruntukan bagi pentadbiran dan pelaksanaan Akta.

4. *Fasal 3* adalah berkenaan dengan perlantikan Ketua Pendaftar, Timbalan Ketua Pendaftar, Pendaftar, Timbalan Pendaftar dan Penolong Pendaftar Institusi Pendidikan Tinggi Swasta.

5. *Fasal 4* dan *5* memperkatakan kuasa Menteri untuk mengeluarkan arahan am dan arahan khas mengenai perkara-perkara berhubung dengan institusi pendidikan tinggi swasta. Arahan-arahan itu hendaklah selaras dengan dasar-dasar, strategi-strategi dan garis-garis panduan kebangsaan mengenai pendidikan tinggi yang digubal dan ditentukan oleh Majlis Pendidikan Tinggi Negara.

BAHAGIAN III

6. *Bahagian III* bertujuan mengawalselia penubuhan institusi pendidikan tinggi swasta.

7. *Fasal 6* dan *7* adalah berkaitan dengan pengemukakan permohonan untuk menubuhkan institusi pendidikan tinggi swasta serta penzahiran oleh pemohon mengenai kepentingan lain dalam permohonannya.

8. *Fasal 8* menghendaki Ketua Pendaftar meluluskan perlembagaan yang dicadangkan bagi institusi pendidikan tinggi swasta dan membuat syor kepada Menteri mengenai permohonan bagi penubuhannya.

9. *Fasal 9* bertujuan memberi kuasa kepada Ketua Pendaftar untuk tidak meneruskan penimbangtelitiannya ke atas suatu permohonan dalam hal keadaan tertentu.

10. *Fasal 10* adalah berkaitan dengan kuasa Menteri untuk memberikan kelulusan atau menolak permohonan bagi kelulusan penubuhan suatu institusi pendidikan tinggi swasta.

11. *Fasal 11* menyatakan keadaan-keadaan yang dalamnya Menteri boleh tidak memberikan kelulusan bagi penubuhan institusi pendidikan tinggi swasta.

12. *Fasal 12* bertujuan menghendaki pemohon yang berjaya memperbadankan sebuah syarikat di dalam negeri bagi maksud institusi

pendidikan tinggi swasta, jika pemohon itu bukan sebuah syarikat. *Fasal 13, 14, 15 dan 16* menetapkan keperluan-keperluan minimum bagi syarikat itu, serta perkara-perkara lain yang berkaitan dengannya.

13. *Fasal 17* membenarkan Ketua Pendaftar mendapatkan maklumat tambahan.

14. *Fasal 18 dan 19* melarang sesuatu institusi pendidikan tinggi swasta menubuhkan cawangan, bergabung, bersekutu atau bekerjasama dengan suatu institusi pendidikan tinggi lain dan membuat apa-apa perkiraan yang menyentuh perniagaan institusi pendidikan tinggi swasta itu tanpa mendapat kelulusan Menteri terlebih dahulu.

15. *Fasal 20* memberi kuasa Menteri untuk meminda syarat atau mengenakan syarat baru berhubungan dengan pemberian kelulusan penubuhan institusi pendidikan tinggi swasta itu.

BAHAGIAN IV

16. *Bahagian IV* mengandungi peruntukan-peruntukan berkaitan dengan penubuhan suatu institusi pendidikan tinggi swasta bertaraf Universiti atau Kolej Universiti, atau cawangannya, atau kampus cawangan suatu Universiti atau Kolej Universiti luar negeri.

17. *Fasal 21* bertujuan menyatakan bahawa kelulusan Menteri hendaklah diperolehi terlebih dahulu sebelum institusi-institusi yang disebutkan dalam perenggan 16 boleh ditubuhkan dan *fasal 22* menetapkan bahawa sesuatu permohonan untuk mendapatkan kelulusan berkenaan hanya boleh dibuat atas pelawaan Menteri. Hanya institusi-institusi ini sahaja yang dibenarkan menganugerahkan ijazah.

BAHAGIAN V

18. *Bahagian V* bertujuan mengadakan peruntukan-peruntukan mengenai pendaftaran institusi pendidikan tinggi swasta.

19. *Fasal 24* bertujuan mengawalselia prosedur bagi mendaftarkan institusi pendidikan tinggi swasta dengan Ketua Pendaftar. Sementara itu *fasal 25* mengadakan daftar institusi pendidikan tinggi swasta. Keperluan memamerkan perakuan pendaftarannya dinyatakan dalam *fasal 26*. Ketua Pendaftar boleh enggan mendaftarkan suatu institusi pendidikan tinggi swasta atas alasan yang diperkatakan dalam *fasal 27*.

20. Suatu tanggungjawab dikenakan ke atas institusi pendidikan tinggi swasta di bawah *fasal 28* untuk mendapatkan kelulusan Ketua Pendaftar sebelum berpindah premis.

21. *Fasal 29* memberi kuasa Ketua Pendaftar untuk meminda syarat-syarat atau mengenakan syarat-syarat baru ke atas pendaftaran suatu institusi pendidikan tinggi swasta.

BAHAGIAN VI

22. *Bahagian VI* memperkatakan pengurusan institusi pendidikan tinggi swasta.

23. *Fasal 30* bertujuan mempertanggungjawabkan tiap-tiap institusi pendidikan tinggi swasta supaya diuruskan betul-betul mengikut perlembagaannya.

24. *Fasal 31,32,33,34 dan 35* mengandungi peruntukan-peruntukan mengenai perlantikan, pendaftaran, tugas serta tanggungjawab seorang ketua eksekutif suatu institusi pendidikan tinggi swasta.

25. *Fasal 36* bertujuan menyenaraikan orang yang tidak layak terlibat dalam pengurusan suatu institusi pendidikan tinggi swasta.

26. *Fasal 37* memberi kuasa Ketua Pendaftar untuk mengeluarkan arahan mengenai tatakelakuan yang sepatutnya berkenaan dengan seseorang ketua eksekutif.

BAHAGIAN VII

27. *Bahagian VII* adalah mengenai pengendalian kursus-kursus pengajian di institusi pendidikan tinggi swasta.

28. Kelulusan Menteri hendaklah diperolehi di bawah *fasal 38* sebelum apa-apa kursus pengajian atau program latihan dikendalikan di institusi pendidikan tinggi swasta, termasuklah bagi pengendaliannya yang dilakukan secara berse sama dengan atau secara bergabung, bersekutu atau berkerjasama dengan institusi pendidikan tinggi swasta lain.

29. *Fasal 39* mengandungi sebutan mengenai suatu pihak berkuasa yang bertanggungjawab menjamin kualiti kursus-kursus pengajian yang dikendalikan di institusi pendidikan tinggi swasta.

30. *Fasal 40* bertujuan membolehkan Menteri mengenakan syarat-syarat apabila memberikan kelulusan bagi mengendalikan kursus pengajian.

31. *Fasal 41 dan 42* memperkatakan bahawa bahasa pengantar bagi kursus-kursus pengajian di institusi pendidikan tinggi swasta ialah bahasa kebangsaan melainkan jika diluluskan oleh Menteri, atas permohonan, untuk dikendalikan dalam bahasa Inggeris dan tertakluk kepada kuasa Menteri untuk kemudiannya mengarahkan supaya kursus pengajian itu dikendalikan pula dalam bahasa kebangsaan.

32. *Fasal 43* menyatakan mata pelajaran wajib yang hendaklah diajar di institusi pendidikan tinggi swasta.

33. *Fasal 44* melarang penganugerahan sijil, diploma atau ijazah oleh sesuatu institusi pendidikan tinggi swasta melainkan jika sijil, diploma atau ijazah itu mencapai piawai minimum yang ditetapkan oleh pihak berkuasa yang ditubuhkan di bawah undang-undang bertulis bagi maksud menetapkan piawai minimum sedemikian. Ini adalah bagi menjamin kualiti dan kredibiliti sijil, diploma dan ijazah yang dianugerahkan oleh institusi pendidikan tinggi swasta.

34. *Fasal 45* bertujuan mengadakan peruntukan mengenai kuasa Menteri untuk membuat peraturan-peraturan bagi penyeliaan, pengawalseliaan dan pengawalan piawaian pendidikan.

PART VIII

35. *Bahagian VIII* mengawalselia disiplin dan tatakelakuan pelajar institusi pendidikan tinggi swasta.

36. *Fasal 46* menyatakan bahawa pihak berkuasa disiplin bagi pelajar institusi pendidikan tinggi swasta ialah ketua eksekutifnya.

37. *Fasal 47, 48 dan 49* melarang beberapa aktiviti pelajar dan memperuntukkan kuasa kepada Ketua Pendaftar untuk menggantung atau membubarkan mana-mana persatuan, badan atau kumpulan pelajar suatu institusi pendidikan tinggi swasta. Sementara *itu fasal 50* pula bertujuan memberi kuasa Ketua Pendaftar untuk membuat peraturan-peraturan tentang pembuangan pelajar dalam kes-kes tertentu, selepas Ketua Pendaftar berunding dengan Menteri.

BAHAGIAN IX

38. *Fasal 51, 52 dan 53* adalah berkaitan dengan pengeluaran dan pembatalan permit mengajar.

BAHAGIAN X

39. *Fasal 54, 55, 56 dan 57* memperihalkan alasan bagi pembatalan kelulusan, pengkenselan pendaftaran dan prosedurnya dan bahawa keputusan tentang pembatalan atau pengkenselan itu adalah berdasarkan dokumen semata-mata.

BAHAGIAN XI

40. Bahagian XI bertujuan mengadakan peruntukan berkaitan dengan penutupan suatu institusi pendidikan tinggi swasta.

41. *Fasal 58* memperkatakan kuasa Menteri memberikan arahan demi melindungi kepentingan pelajar.

42. *Fasal 59* menetapkan alasan-alasan bagi pemberhentian kegiatan perniagaan dan penutupan institusi pendidikan tinggi swasta, sementara *fasal 60* memperkatakan cara penyampaian notis tentang niat menutup suatu institusi pendidikan tinggi swasta.

43. *Fasal 61* mengenakan tanggungjawab ke atas lembaga pengarah syarikat yang menubuhkan institusi pendidikan tinggi swasta untuk membuat perkiraan bagi membolehkan pelajar-pelajar meneruskan pembelajaran mereka setelah institusi pendidikan tinggi swasta itu ditutup.

44. *Fasal 62* bertujuan mengadakan peruntukan bagi pemulangan perakuan-perakuan apabila sesuatu institusi pendidikan tinggi swasta ditutup.

BAHAGIAN XII

45. Bahagian XII bertujuan mengadakan peruntukan bagi kuasa Ketua Pendaftar untuk memeriksa semua institusi pendidikan tinggi swasta dalam *fasal 63* dan *64*.

BAHAGIAN XIII

46. Bahagian XIII memperkatakan penguatkuasaan dan penyiasatan terhadap institusi pendidikan tinggi swasta.

47. Kuasa pegawai penyiasat termasuklah kuasa untuk menggeledah dan menyita, sama ada dengan waran atau tanpa waran, serta juga kuasa untuk mengunci suatu institusi pendidikan tinggi swasta dan memanggil untuk diperiksa, sebagaimana yang ditetapkan dalam *fasal 66, 67, 68, 69* dan *70*.

BAHAGIAN XIV

48. Bahagian XIV mewujudkan kesalahan-kesalahan dan penalti-penalti.

49. *Fasal 72, 73, 74* dan *75* mengandungi peruntukan-peruntukan berkaitan dengan iklan dan pernyataan yang mengelirukan.

50. *Fasal 76, 77, 78, 79, 80* dan *81* memperihalkan kesalahan-kesalahan di bawah Akta dan mengadakan peruntukan bagi penalti denda antara lima ribu ringgit hingga ke dua ratus ribu ringgit serta penjara selama tempoh dari satu bulan hingga dua tahun.

51. Peruntukan mengenai penalti am dan penalti bagi kesalahan yang berterusan ditetapkan dalam *fasal* 82 dan 83.
52. *Fasal 84* memperkatakan kesalahan-kesalahan yang dilakukan oleh pertubuhan perbadanan.
53. *Fasal 85* memperkatakan tanggungan pengarah-pengarah dan pegawai-pegawai lain institusi pendidikan tinggi swasta.
54. Kuasa mengkompaun kesalahan diberikan kepada Ketua Pendaftar dalam *fasal* 86, tertakluk kepada kelulusan Pendakwa Raya.
55. Pemulaan dan perjalanan pendakwaan diperkatakan dalam *fasal* 87.

BAHAGIAN XV

56. Kuasa Menteri untuk membuat peraturan-peraturan terkandung dalam *fasal* 88 yang merupakan peruntukan tunggal dalam Bahagian XV.

BAHAGIAN XVI

57. Bahagian XVI mengandungi peruntukan-peruntukan am.
58. *Fasal 89* melarang diskriminasi jantina, ras, agama, bangsa atau kelas bagi keanggotaan dan penganugerahan daripada institusi pendidikan tinggi swasta.
59. *Fasal 90* bertujuan melindungi Kerajaan, Menteri, Ketua Pendaftar, pegawai-pegawai lain yang dilantik di bawah Akta dan mana-mana pegawai kerajaan, daripada sebarang tindakan atau pendakwaan di dalam mana-mana mahkamah berkaitan dengan apa-apa yang dilakukan atau ditinggalkan daripada dilakukan, dengan niat baik, di bawah Akta.
60. Di bawah *fasal 91* tiap-tiap orang yang dilantik di bawah Akta atau yang menjalankan kuasa di bawah Akta secara sah hendaklah disifatkan sebagai pengkhidmat awam.
61. *Fasal 92* memperuntukkan Menteri kuasa untuk mengecualikan mana-mana institusi pendidikan tinggi swasta daripada beberapa peruntukan tertentu dalam Akta kecuali peruntukan mengenai keperluan untuk mendapatkan kelulusan bagi penubuhan dan pendaftaran serta kawalan kualiti pendidikan.
62. Keperluan-keperluan berkaitan dengan premis ditetapkan dalam *fasal 93*.

63. *Fasal 94* mengawalselia penyampaian notis, dsb. di bawah Akta.
64. *Fasal 95* mengecualikan semua institusi pendidikan yang ditubuhkan di bawah Akta Pendidikan 1995, Institut Teknologi MARA, Universiti-Universiti dan Kolej-Kolej Universiti yang ditubuhkan di bawah Akta Universiti dan Kolej Universiti 1971 dan mana-mana institusi pendidikan yang ditubuhkan di bawah mana-mana undang-undang bertulis lain, daripada pemakaian Akta ini.

BAHAGIAN XVII

65. Bahagian XVII bertujuan mengadakan peruntukan kecualian dan peralihan.
66. *Fasal 96* mengandungi peruntukan kecualian dan peralihan berkaitan dengan institusi pendidikan tinggi swasta yang sedia ada.
67. *Fasal 97* membenarkan perakuan pendaftaran sementara yang dikeluarkan atau disifatkan telah dikeluarkan di bawah Akta Pendidikan 1995 ditukarkan menjadi perakuan pendaftaran yang dikeluarkan di bawah *Akta ini*.
68. *Fasal 98* bertujuan memberikan Menteri kuasa untuk membuat peruntukan-peruntukan peralihan tambahan.
69. *Fasal 99* mengandungi peruntukan peralihan berkaitan dengan guru-guru.

IMPLIKASI KEWANGAN

Rang Undang-Undang ini akan melibatkan Kerajaan dalam perbelanjaan wang tambahan yang amaunnya belum dapat ditentukan sekarang. [PN. (U²) 1808.]